

四庫全書薈要

• 乾隆御覽本

史部

史記卷九十一

漢 太 史 令司馬遷 撰

宋中郎外兵曹參軍裴駢集解

唐國子博士弘文館學士司馬貞索隱

唐諸王侍讀率府長史張守節正義

黥布列傳第三十一

黥布者六人也姓英氏

索隱地理志廬江有六縣蘇林曰今為六安也布本姓英英國

名也咎繇之後布以少時有人相云當刑而王故漢雜事云布改姓黥以厭當之也正義故六城在壽州安豐縣西南百三十三里按黥布封淮南王都六即此城又春秋傳六與蓼咎繇之後或封於英六蓋英後改為蓼也秦時為布衣少年有客相之曰當刑而王及壯坐法

黥布欣然笑曰人相我當刑而王幾是乎

集解徐廣曰幾一作豈駟

謂幾近也索隱臣瓚音機楚漢春秋作豈是乎故徐廣云一作豈劉氏音祈祈者語辭也義亦通

人有

聞者共俳笑之

索隱謂衆共以俳優輩笑之

布已論輸麗山

正義言布論決

受黥竟麗山作陵也時會稽郡輸身徒

麗山之徒數十萬人布皆與其徒

長豪桀交通廼率其曹偶亡之江中為羣盜

索隱曹輩也偶類也

謂徒之革類

陳勝之起也布廼見番君與其衆叛秦聚兵數

千人番君以其女妻之章邯之滅陳勝破呂臣軍布乃

引兵北擊秦左右校破之清波引兵而東聞項梁定江

東會稽

正義時會稽郡所理在吳閶閭城中

涉江而西陳嬰以項氏世為

楚將廼以兵屬項梁渡淮南英布蒲將軍亦以兵屬項

梁項梁涉淮而西擊景駒秦嘉等布常冠軍項梁至薛

正義薛古城在徐州滕縣界也

聞陳王定死廼立楚懷王項梁號為武

信君英布為當陽君

正義南郡當陽縣也

項梁敗死定陶懷王徙

都彭城諸將英布亦皆保聚彭城當是時秦急圍趙趙

數使人請救懷王使宋義為上將范增為末將項籍為

次將英布蒲將軍皆為將軍悉屬宋義北救趙及項籍

殺宋義於河上懷王因立籍為上將軍諸將皆屬項籍

項籍使布先涉渡河擊秦布數有利籍廼悉引兵涉河

從之遂破秦軍降章邯等楚兵常勝功冠諸侯諸侯兵

皆以服屬楚者以布數以少敗衆也項籍之引兵西至

新安

正義新安故城在河南府澠池縣東二十二里

又使布等夜擊坑章邯秦

卒二十餘萬人至關不得入又使布等先從間道破關

下軍

索隱鄒氏云間音閑閑謂私也今間音紀覓反間道即他道也猶若反間之義

遂得入至

咸陽布常為軍鋒

索隱索漢書作楚軍前簿簿者鹵簿

項王封諸將立布

為九江王都六漢元年四月諸侯皆罷戲下各就國項

氏立懷王為義帝徙都長沙廼陰令九江王布等行擊

之其八月布使將擊義帝追殺之郴縣

正義郴丑林反今郴州有義帝

冢及祠

漢二年齊王田榮畔楚項王往擊齊徵兵九江九

江王布稱病不往遣將將數千人行漢之敗楚彭城布

又稱病不佐楚項王由此怨布數使使者誚讓召布

集解

駟案漢書音義誚責也

布愈恐不敢往項王方北憂齊趙西患漢

所與者獨九江王又多布材欲親用之以故未擊漢三

年漢王擊楚大戰彭城不利出梁地至虞

正義今宋州虞城也謂

左右曰

索隱案謂隨何

如彼等者無足與計天下事謁者隨何

進曰不審陛下所謂漢王曰孰能為我使淮南令之發

兵倍楚留項王於齊數月我之取天下可以百全隨何

曰臣請使之廼與二十人俱使淮南至因太宰主之

集解

綱案漢書音義曰淮南太宰作內主也
韋昭曰主舍也索隱太宰掌膳食之官

三日不得見隨

何因說太宰曰王之不見何必以楚為彊以漢為弱此
臣之所以為使使何得見言之而是邪是大王所欲聞
也言之而非邪使何等二十人伏斧質淮南市以明王
倍漢而與楚也太宰廼言之王王見之隨何曰漢王使
臣敬進書大王御者竊怪大王與楚何親也淮南王曰
寡人北鄉而臣事之隨何曰大王與項王俱列為諸侯
北鄉而臣事之必以楚為彊可以託國也項王伐齊身

負板築

集解李奇曰板牆板也築杵也

以為士卒先大王宜悉淮南之

衆身自將之為楚軍前鋒今廼發四千人以助楚夫北

面而臣事人者固若是乎夫漢王戰於彭城項王未出

齊也大王宜騷淮南之兵

集解駢案騷音掃

渡淮日夜會戰彭

城下大王撫萬人之衆無一人渡淮者垂拱而觀其孰

勝夫託國於人者固若是乎大王提空名以鄉楚而欲

厚自託臣竊為大王不取也然而大王不背楚者以漢

為弱也夫楚兵雖強天下負之不義之名

索隱負猶被也以不義被

身其以其背盟約而殺義帝也然而楚王恃戰勝自彊漢

王收諸侯還守成臯滎陽下蜀漢之衆深溝壁壘分卒

守徼乘塞

索隱徼謂邊境亭鄣以徼繞邊陸常守之也乘者登也登塞垣而守之

楚人還

兵間以梁地深入敵國八九百里

集解張晏曰羽從齊還當經梁地八九百

里廼得羽地索隱案服虔曰梁在楚漢之中央

欲戰則不得攻城則力不能老

弱轉糧千里之外楚兵至滎陽成臯漢堅守而不動進

則不得攻退則不能解故曰楚兵不足恃也

集解徐廣曰恃一作

罷言其已困不足復苦也

使楚勝漢則諸侯自危懼而

索隱案漢書作罷音皮

相救夫楚之彊適足以致天下之兵耳故楚不如漢其

勢易見也今大王不與萬全之漢而自託於危亡之楚

臣竊為大王惑之臣非以淮南之兵足以亡楚也夫大

王發兵而倍楚項王必留留數月漢之取天下可以萬

全臣請與大王提劍而歸漢漢王必裂地而封大王又

況淮南淮南必大王有也故漢王敬使使臣進愚計願

大王之留意也淮南王曰請奉命陰許畔楚與漢未敢

泄也楚使者在

集解文穎曰
在淮南王所

方急責英布發兵舍傳舍

隨何直入坐楚使者上坐曰九江王已歸漢楚何以得

發兵布愕然楚使者起何因說布曰事以構索隱構成也可

遂殺楚使者無使歸而疾走漢并力索隱走音秦向也布曰如

使者教因起兵而擊之耳於是殺使者因起兵而攻楚

楚使項聲龍且攻淮南項王留而攻下邑正義宋州碭山縣數

月龍且擊淮南破布軍布欲引兵走漢恐楚王殺之故

間行與何俱歸漢淮南王至集解徐廣曰三年十二月上方踞牀洗

衣布入見布甚大怒悔來欲自殺出就舍帳御飲食從

官如漢王居布又大喜過望

正義高祖以布先分為王恐其自尊大故峻禮令布

折服已而美其帷帳厚其飲食多其從官以悅其心權道也

於是廼使人入九江楚

已使項伯收九江兵盡殺布妻子布使者頗得故人幸臣將衆數千人歸漢漢益分布兵而與俱北收兵至成臯四年七月立布為淮南王與擊項籍漢五年布使人入九江得數縣六年布與劉賈入九江誘大司馬周殷周殷反楚遂舉九江兵與漢擊楚破之垓下項籍死天下定上置酒上折隨何之功謂何為腐儒為天下安用

腐儒

索隱腐音輔謂之腐儒言如腐敗之物不任用也

隨何跪曰夫陛下引兵

攻彭城楚王未去齊也陛下發步卒五萬人騎五千能以取淮南乎上曰不能隨何曰陛下使何與二十人使淮南至如陛下之意是何之功賢於步卒五萬人騎五千也然而陛下謂何腐儒為天下安用腐儒何也上曰吾方圖子之功廼以隨何為護軍中尉布遂剖符為淮南王都六九江廬江衡山豫章郡皆屬布七年朝陳八年朝雒陽九年朝長安十一年高后誅淮陰侯布因心

恐夏漢誅梁王彭越醢之盛其醢徧賜諸侯至淮南淮

南王方獵見醢因大恐陰令人部聚兵候伺旁郡警急

集解張晏曰
欲有所會

布所幸姬疾請就醫醫家與中大夫賁赫

對門

集解徐廣曰賁音
肥索隱人姓名也

姬數如醫家賁赫自以為侍中

廼厚餽遺從姬飲醫家姬侍王從容語次譽赫長者也

王怒曰汝安從知之具說狀王疑其與亂赫恐稱病王

愈怒欲捕赫赫言變事乘傳詣長安布使人追不及赫

至上變言布謀反有端可先未發誅也上讀其書語蕭

相國相國曰布不宜有此恐仇怨妄誣之請繫赫使人

微

集解駢案一作微

驗淮南王淮南王布見赫以罪亡上變固

已疑其言國陰事漢使又來頗有所驗遂族赫家發兵反反書聞上廼赦責赫以為將軍上召諸將問曰布反為之奈何皆曰發兵擊之坑豎子耳何能為乎汝陰侯滕公召故楚令尹問之令尹曰是固當反滕公曰上裂

地而王之疏爵而貴之

集解駢案漢書音義曰疏分也禹決江疏河是也索隱尚書曰

列爵惟五分土惟三按裂地是對文故知疏即分也

南面而立萬乘之主其反何

也令尹曰往年殺彭越前年殺韓信

集解駢案往年前年同耳使文相避

也言此三人者同功一體之人也自疑禍及身故反耳

滕公言之上曰臣客故楚令尹薛公者其人有籌策之計可問上廼召見問薛公薛公對曰布反不足怪也使布出於上計山東非漢之有也出於中計勝敗之數未

可知也出於下計陛下安枕而臥矣上曰何謂上計令

尹對曰東取吳

正義荆王劉賈都吳蘇州閭閻城也

西取楚

正義楚王劉交都徐州下

邳并齊取魯傳檄燕趙固守其所山東非漢之有也何

謂中計東取吳西取楚并韓取魏據敖倉之粟

索隱案太康地

記云秦建敖倉於成臯又立庾故亦云敖庾也

塞成臯之口勝敗之數未可知

也何謂下計東取吳西取下蔡

正義古州來國

歸重於越身歸

長沙

正義今潭州

陛下安枕而臥漢無事矣

集解駢案桓譚新論曰世有圖

碁之戲或言是兵法之類也及為之上者遠碁疏張置以會圍因而成多得道之勝中者則務相絕遮要以爭使求利故勝負狐疑須計數而定下者則守邊隅超作罪以自生於小地然亦必不如蔡薛公之言上計云取吳楚并齊魯及燕趙者此廣道地之謂中計云取吳楚并韓魏塞成臯據敖倉此超遮要爭利者也下計云取吳下蔡據長沙以臨越此守邊隅

上曰是計將安出令

超作罪者也索隱罪音烏卦反

尹對曰出下計上曰何謂廢上中計而出下計令尹曰
布故麗山之徒也自致萬乘之主此皆為身不顧後為
百姓萬世慮者也故曰出下計上曰善封薛公千戶

索隱

劉氏云薛公得封千戶蓋關內侯也

廼立皇子長為淮南王上遂發兵自

將東擊布布之初反謂其將曰上老矣厭兵必不能來

使諸將諸將獨患淮陰彭越今皆已死餘不足畏也故

遂反果如薛公籌之東擊荊荆王劉賈走死富陵

正義故城

在楚州時昭縣東北六十里

盡劫其兵渡淮擊楚楚發兵與戰徐僮

間集解如淳曰地名也索隱案地理志臨淮有徐縣僮縣正義杜預云徐在下邳僮縣東括地志云大徐城

在泗州徐城縣北四十里古徐國也為三軍欲以相救為奇或說楚將曰

布善用兵民素畏之且兵法諸侯戰其地為散地集解

漢書音義曰謂散滅之地正義魏武帝注孫子曰卒戀土地道近而易散敗今別為三彼敗

吾一軍餘皆走安能相救不聽布果破其一軍其二軍

散走遂西與上兵遇斬西會垂索隱上古外反下持瑞反韋昭云斬之鄉名漢

書作垂應劭音保非也正義斬音機沛郡蘄城也甄遂瑞反布兵精甚上廼壁庸城

集解鄧展曰地名也望布軍置陳如項籍軍上惡之與布相望見

遙謂布曰何苦而反布曰欲為帝耳上怒罵之遂大戰

布軍敗走渡淮數止戰不利與百餘人走江南布故與

番君婚以故長沙哀王

集解徐廣曰表云成王臣吳芮之子也駟案晉灼曰芮之孫固

或曰是成王非哀王也傳誤也使人給布偽與亡誘走越故信而隨之

番陽

索隱番陽鄱縣之鄉

番陽人殺布茲鄉民田舍

正義英布冢在饒州鄱陽

縣北百五十里十三步遂滅黥布立皇子長為淮南王封賁赫為

期思侯

正義期思故城在光州固始縣界

諸將率多以功封者

集解漢書曰將

封者六人

太史公曰英布者其先豈春秋所見楚滅英六皐陶之

後哉身被刑法何其拔興之暴也

索隱拔音白
曷反疾也

項氏之

所坑殺人以千萬數而布常為首虐功冠諸侯用此得

王亦不免於身為世大僂禍之興自愛姬殖妒媚生患

竟以滅國

集解駟案媚音冒媚亦妒也索隱漢書外戚傳亦云成結寵妾妒媚之誅又論衡云妬夫

媚婦則媚是妬之別名今原英布之誅為疑責赫與其
姬妃有亂故至滅國所以不得言妬媚是媚也一云男

妬曰
媚

索隱迷贊曰九江初筮當刑而王既免徙中聚盜江
上再雄楚卒頻破秦將病為羽疑歸受漢杖責赫見

毀卒致
無妄

史記卷九十一

史記卷九十一考證

黥布列傳共俳笑之索隱謂衆共以俳優輩笑之○臣

照

按急就章云倡優俳笑觀倚庭顏師古注曰俳謂

優之褻狎者也言相與諧謔而非笑之非以俳優輩

相目也

聚兵數千人○監本脫人字今添

淮南王曰○顧炎武曰隨何說英布當書九江王不當
書淮南王歸漢之後始立為淮南王也蓋採之諸書

其稱未一

言此三人者同功一體之人也○

臣照

按言字疑衍蓋

從上信字訛寫也

史記卷九十一 考證

謹案卷九十第三頁前一行漢武更山陽為昌邑
國刊本脫邑字據地理志增

第三頁後七行肅縣屬楚刊本屬訛今今改

第四頁後一行皆復為楚刊本復訛後據監本王
本改

卷九十一第九頁後七行果如薛公壽之東擊荆
刊本如訛加今改

第十一頁前六行媚是媚也刊本媚訛媚據毛本

欽定四庫全書

索隱改



萬曆二十九年
金華書會
對人寶

總校官庶吉士臣侍朝

校對官檢討臣王鍾健

膳錄監生臣劉復善

欽定四庫全書薈要

史部

史記卷九十二至
四



詳校官主事銜臣徐以坤

史記卷九十二

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

淮陰侯列傳第三十二

淮陰侯韓信者淮陰人也

正義楚州淮陰縣也

始為布衣時貧無



行不得推擇為吏

集解李奇曰無善行可推舉選擇

又不能治生商賈

常從人寄食飲人多厭之者常數從其下鄉南昌亭長

寄食

集解張晏曰下鄉縣屬淮陰也索隱案楚漢春秋南昌作新昌亭長者主亭之吏也

數月亭

長妻患之乃晨炊蓐食

集解張晏曰未起而牀蓐中食

食時信往不為

具食信亦知其意怒竟絕去信釣於城下

正義淮陰城北臨淮水

諸母漂

集解韋昭曰以水擊絮為漂故曰漂母

有一母見信飢飯信竟漂

數十日信喜謂漂母曰吾必有以重報母母怒曰大丈夫

不能自食吾哀王孫而進食

集解蘇林曰如言公子也索隱劉德曰秦末多

失國言王孫公子尊之
也張晏曰字王孫非也
豈望報乎淮陰屠中少年有侮

信者曰若雖長大好帶刀劍中情怯耳衆辱之曰信能

死刺我不能死出我袴下

集解徐廣曰袴一作騰騰股也音同又云漢書作跨同耳

索隱騰音枯化反然尋此文作袴欲依字讀
何為不通袴下即騰下也何必須要作騰下
於是信孰

視之俛出袴下蒲伏

正義俛音俯伏蒲北反

一市人皆笑信以為

怯及項梁渡淮信仗劍從之居戲下

集解徐廣曰戲一作麾

無所

知名項梁敗又屬項羽羽以為郎中數以策干項羽羽

不用漢王之入蜀信亡楚歸漢未得知名為連敖

集解徐廣

曰典客也索隱李奇云
楚官名張晏曰司馬也

坐法當斬其輩十三人皆已斬

次至信信乃仰視適見滕公曰上不欲就天下乎何為
斬壯士滕公奇其言壯其貌釋而不斬與語大悅之言
於上上拜以為治粟都尉上未之奇也信數與蕭何語
何奇之至南鄭諸將行道亡者數十人信度何等已數
言上上不我用即亡何聞信亡不及以聞自追之人有
言上曰丞相何亡上大怒如失左右手居一二日何來
謁上上且怒且喜罵何曰若亡何也何曰臣不敢亡也

臣追亡者上曰若所追者誰何曰韓信也上復罵曰諸將亡者以十數公無所追追信詐也何曰諸將易得耳

至如信者國士無雙王必欲長王漢中無所事信

集解文穎

曰事猶業也張晏曰無事用信

必欲爭天下非信無所與計事者顧王

策安所決耳王曰吾亦欲東耳安能鬱鬱久居此乎何曰王計必欲東能用信信即留不能用信終亡耳王曰吾為公以為將何曰雖為將信必不留王曰以為大將何曰幸甚於是王欲召信拜之何曰王素慢無禮今拜

大將如呼小兒耳此乃信所以去也王必欲拜之擇良
日齋戒設壇場具禮乃可耳王許之諸將皆喜人人各
自以為得大將至拜大將乃信也一軍皆驚信拜禮畢
上坐王曰丞相數言將軍將軍何以教寡人計策信謝
因問王曰今東鄉爭權天下豈非項王邪漢王曰然曰
大王自料勇悍仁彊孰與項王漢王默然良久曰不如
也信再拜賀曰惟信亦以為大王不如也然臣嘗事之
請言項王之為人也項王喑噁叱咤千人皆廢

集解晉灼曰廢

不收也索隱暗於鳩反噫烏路反叱昌衆反咤卓嫁反
或作吒暗噫懷怒氣叱咤發怒聲孟康曰廢伏也張晏

曰廢然不能任屬賢將此特匹夫之勇耳項王見人恭
倨也

敬慈愛言語嘔嘔

集解駢案音句于反索隱嘔音吁
漢書作姁姁鄧展曰姁姁和好貌人

有疾病涕泣分食飲至使人有功當封爵者卽剋弊忍

不能予

集解駢案漢書
音義曰不忍授

此所謂婦人之仁也項王雖霸

天下而臣諸侯不居關中而都彭城有背義帝之約而

以親愛王諸侯不平諸侯之見項王遷逐義帝置江南

亦皆歸逐其主而自王善地項王所過無不殘滅者天

下多怨百姓不親附特劫于威彊耳名雖為霸實失天

下心故曰其彊易弱今大王誠能反其道任天下武勇

何所不誅以天下城邑封功臣何所不服以義兵從思

東歸之士何所不散

索隱劉氏云用東歸之兵擊東方之敵此敵無不散敗也

且三

秦王為秦將將秦子弟數歲矣所殺亡不可勝計又欺

其衆降諸侯至新安項王詐坑秦降卒二十餘萬唯獨

邯欣翳得脫秦父兄怨此三人痛入骨髓今楚彊以威

王此三人秦民莫愛也大王之入武關秋毫無所害

索隱

案秋毫秋乃成王逸注楚詞云銳毛為毫夏落秋生也

除秦苛法與秦民約法三

章耳秦民無不欲得大王王秦者於諸侯之約大王當

王關中關中民咸知之大王失職入漢中秦民無不恨

者今大王舉而東三秦可傳檄而定也

索隱案說文云檄二尺書也此

云傳檄謂為檄書以責所伐者

於是漢王大喜自以為得信晚遂聽信

計部署諸將所擊八月漢王舉兵東出陳倉

正義漢王從關北出

岐州陳倉縣

定三秦漢二年出關

正義出函谷關

收魏河南韓殷王

皆降合齊趙共擊楚四月至彭城漢兵敗散而還信復

收兵與漢王會滎陽復擊破楚京索之間以故楚兵卒

不能西漢之敗卻彭城

正義兵敗散彭城而却退

塞王欣翟王翳亡

漢降楚齊趙亦反漢與楚和六月魏王豹謁歸視親疾

至國即絕河關

索隱今蒲津關

反漢與楚約和漢王使酈生說

豹不下其八月以信為左丞相擊魏魏王盛兵蒲坂塞

臨晉

索隱塞音先得反臨晉縣名在河東之東岸對舊關也

信乃益為疑兵

集解關案

漢書音義曰益張旌旗以疑敵者

陳船欲渡臨晉

索隱劉氏云陳船地名在舊關之西今之

朝邑非也案京兆有船司空縣不名陳船陳船者陳列船艘欲渡河也

而伏兵從夏陽以

木罌瓦渡軍

集解徐廣曰瓦一作缶服虔曰以木押縛罌瓦以渡

軍無船且尚密也正義按韓信詐陳列船艘於臨晉欲渡河即此從夏陽木押罌瓦度軍襲安邑臨晉同州東

朝邑界夏陽在同州北渭城界襲安邑

正義安邑故城在絳川夏縣東北十五里

魏王豹驚

引兵迎信信遂虜豹

索隱劉氏云夏陽舊無船豹不備之而防臨晉耳今安邑被襲故豹

遂降也定魏為河東郡

正義今安邑縣故城

漢王遣張耳與信俱引

兵東北擊趙代後九月破代兵禽夏說閑與

集解徐廣曰音余駟

案李奇曰夏說代相也索隱司馬彪郡國志上黨沾縣有閑與聚閑音昌又音鄔與音余又音預沾音他廉反正義閑與聚城在潞州信之下魏破代漢輒使人收其

銅鞮縣西北二十里

精兵詣滎陽以距楚信與張耳以兵數萬欲東下井陘

擊趙

索隱案地理志常山石邑縣井陘山在西又穆天子傳云至于陘山之隧升于三道之磴是也

趙

王成安君陳餘聞漢且襲之也聚兵井陘口

正義井陘故關在井

州石邑縣東十八里即井陘口

號稱二十萬廣武君李左車說成安君

曰聞漢將韓信涉西河虜魏王禽夏說新喋血關與

索隱

喋舊音軟非也案陳湯傳喋血萬里之外也如淳云殺人血流滂沱也韋昭音徒協反

今乃輔以

張耳議欲下趙此乘勝而去國遠關其鋒不可當臣聞

千里餽糧士有飢色樵蘇後爨

集解駟案漢書音義曰樵取薪也蘇取草也

師不宿飽今井陘之道車不得方軌騎不得成列行數
百里其勢糧食必在其後願足下假臣奇兵三萬人從
間路絕其輜重足下深溝高壘堅營勿與戰彼前不得
鬪退不得還吾奇兵絕其後使野無所掠不至十日而
兩將之頭可致於戲下願君留意臣之計否必為二子
所禽矣成安君儒者也常稱義兵不用詐謀奇計曰吾
聞兵法十則圍之倍則戰之今韓信兵號數萬其實不
過數千能千里而襲我亦以罷極今如此避而不擊後

有大者何以加之則諸侯謂吾怯而輕我

集解駢案輕我伐我一本

作輕來伐我

伐我不聽廣武君策廣武君策不用韓信使人

間視知其不用還報則大喜乃敢引兵遂下

正義引兵入井陘狹

趙道出

未至井陘口三十里止舍夜半傳發

集解駢案漢書音義曰傳

令軍中使發

選輕騎二十人人持一赤幟從間道草山而望

趙軍

集解如淳曰草音蔽依山自覆蔽索隱索謂令從間道小路向前望見陳餘軍即住仍須隱山自蔽

勿令趙軍知也蔽者蓋覆也楚漢春秋作卑山漢書作軍山說文云草蔽也從竹卑聲

誠曰趙見

我走必空壁逐我若疾入趙壁拔趙幟立漢赤幟令其

裨將傳殮曰今日破趙會食

集解如淳曰小飯曰殮言破趙後乃當共飽食也

諸將皆莫信詳應曰諾謂軍吏曰趙已先據便地為壁

且彼未見吾大將旗鼓未肯擊前行恐吾至阻險而還

信乃使萬人先行出背水陣

正義綿蔓水一名阜將一名回星自并州流入井陘

界即信背水陣陷之死地即此水也

趙軍望見而大笑平旦信建大將之

旗鼓鼓行出井陘口趙開壁擊之

正義恒州鹿泉縣即六國時趙壁也

大

戰良久於是信張耳詳棄鼓旗走水上軍水上軍開入

之復疾戰趙果空壁爭漢鼓旗逐韓信張耳韓信張耳

已入水上軍軍皆殊死戰不可敗信所出奇兵二千騎

共候趙空壁逐利則馳入趙壁皆拔趙旗立漢赤幟二

千趙軍已不勝不能得信等欲還歸壁壁皆漢赤幟而

大驚以為漢皆已得趙王將矣兵遂亂遁走趙將雖斬

之不能禁也於是漢兵夾擊大破虜趙軍斬成安君泚

水上禽趙王歇信乃令軍中毋殺廣武君有能生得者

購千金於是有縛廣武君而致戲下者信乃解其縛東

鄉坐西鄉對師事之諸將效首虜休畢賀

索隱如淳云效致也晉灼

曰效數也鄭玄注
禮效猶呈見也

因問信曰兵法右倍山陵前左水澤

今者將軍令臣等反背水陣曰破趙會食臣等不服然
竟以勝此何術也信曰此在兵法顧諸君不察耳兵法
不曰陷之死地而後生置之亡地而後存且信非得素
拊循士大夫也此所謂驅市人而戰之其勢非置之死
地使人人自為戰今予之生地皆走寧尚可得而用之
乎諸將皆服曰善非臣所及也於是信問廣武君曰僕
欲北攻燕東伐齊何若而有功廣武君辭謝曰臣聞敗

軍之將不可以言勇亡國之大夫不可以圖存今臣敗
亡之虜何足以權大事乎信曰僕聞之百里奚居虞而
虞亡在秦而秦霸非愚於虞而智於秦也用與不用聽
與不聽也誠令成安君聽足下計若信者亦已為禽矣
以不用足下故信得侍耳因固問曰僕委心歸計願足
下勿辭廣武君曰臣聞智者千慮必有一失愚者千慮
必有一得故曰狂夫之言聖人擇焉顧恐臣計未必足
用願效愚忠夫成安君有百戰百勝之計一旦而失之

軍敗鄔下

集解李奇曰鄔音臚今高邑是

身死泚上今將軍涉西河

索隱

此西河當馮翊也正義即同州龍門河從夏陽度者

虜魏王禽夏說關與一舉而

下井陘不終朝破趙二十萬衆誅成安君名聞海內威

震天下農夫莫不輟耕釋耒輸衣甘食

索隱輸郤氏音輸美也恐滅亡

不火故廢止作業而事美衣甘食一曰偷

苟且也慮不圖久故也漢書作美衣輸食傾耳以待命

者

集解如淳曰恐滅亡不火故也

若此將軍之所長也然而衆勞卒罷

其實難用今將軍欲舉倦罷之兵頓之燕堅城之下欲

戰恐久力不能拔情見勢屈曠日糧竭而弱燕不服齊

必距境以自彊也燕齊相持而不下則劉項之權未有

所分也若此者將軍所短也臣愚竊以為亦過矣故善

用兵者不以短擊長而以長擊短韓信曰然則何由廣

武君對曰方今為將軍計莫如案甲休兵鎮趙撫其孤

百里之內半酒日至以饗士大夫驛兵

集解駟案魏都賦曰有驛順時

劉逵曰驛酒也索隱劉氏依劉逵作驛酒謂以酒食養兵士也案史記古釋字皆如此豈亦謂以酒食驛兵士

故字從酉乎北首燕路

正義首音狩向也

而後遣辯士奉咫尺之書

正義咫尺八寸言其簡牘或長尺也暴其所長於燕

正義暴音僕

燕必不敢不

聽從燕已從使誼言者東告齊齊必從風而服雖有智者亦不知為齊計矣如是則天下事皆可圖也兵固先聲而後實者此之謂也韓信曰善從其策發使使燕燕從風而靡乃遣使報漢因請立張耳為趙王以鎮撫其國漢王許之乃立張耳為趙王楚數使奇兵渡河擊趙趙王耳韓信往來救趙因行定趙城邑發兵詣漢楚方意圍漢王於滎陽漢王南出之宛葉間

正義宛在鄧州葉在許州

得黥布走入成皐楚又復急圍之六月漢王出成皐東

渡河獨與滕公俱從張耳軍脩武至宿傳舍晨自稱漢

使馳入趙壁張耳韓信未起即其臥內上奪其印符以

麾召諸將易置之信耳起乃知漢王來大驚漢王奪兩

人軍即令張耳備守趙地拜韓信為相國收趙兵未發

者擊齊

集解文穎曰謂趙人未嘗見發者

信引兵東未渡平原

正義懷州有平

原聞漢王使酈食其已說下齊韓信欲止范陽辯士蒯

通說信曰將軍受詔擊齊而漢獨發間使下齊寧有詔

止將軍乎何以得毋行也且酈生一士伏軾

集解韋昭曰軾今小

車中隆
起者

掉三寸之舌下齊七十餘城將軍將數萬衆歲

餘乃下趙五十餘城為將數歲反不如一豎儒之功乎

於是信然之從其計遂渡河齊已聽酈生即留縱酒罷

備漢守禦信因襲齊歷下軍

集解徐廣曰
濟南歷城縣

遂至臨菑齊

王田廣以酈生賣已乃亨之而走高密使使之楚請救

韓信已定臨菑遂東追廣至高密西楚亦使龍且將號

稱二十萬救齊齊王廣龍且并軍與信戰未合人或說

龍且曰漢兵遠鬪窮戰其鋒不可當齊楚自居其地戰

兵易敗散

正義近其室家懷顧望也

不如深壁令齊王使其信臣招

所亡城亡城聞其王在楚來救必反漢漢兵二千里客

居齊城皆反之其勢無所得食可無戰而降也龍且曰

吾平生知韓信為人易與耳且夫救齊不戰而降之吾

何功今戰而勝之齊之半可得何為止遂戰與信夾濰

水陳

集解徐廣曰出東莞而東北流至北海都昌縣入海索隱濰音維地理志濰水出琅邪其縣東北至

都昌入海徐所引蓋據水經與此小不同

韓信乃夜令人為萬餘囊滿盛沙

壅水上流引軍半渡擊龍且佯不勝還走龍且果喜曰

固知信怯也遂追信渡水信使人決壅囊水大至龍且

軍大半不得渡即急擊殺龍且龍且水東軍散走齊王

廣亡去信遂追北至城陽

正義城陽雷澤縣是在濮州東南九十一里

皆虜

楚卒漢四年遂皆降平齊使人言漢王曰齊偽詐多變

反覆之國也南邊楚不為假王以鎮之其勢不定願為

假王便當是時楚方急圍漢王於滎陽韓信使者至發

書

集解張晏曰發信使者所齎書

漢王大怒罵曰吾困於此旦暮望若

來佐我乃欲自立為王張良陳平躡漢王足因附耳語

曰漢方不利寧能禁信之王乎不如因而立善遇之使

自為守不然變生漢王亦悟因復罵曰大丈夫定諸侯

即為真王耳何以假為乃遣張良往立信為齊王

下所廣

曰四年二月徵其兵擊楚楚已亡龍且項王恐使盱眙人武

涉往說齊王信

集解張華曰武涉墓在盱眙城東十五里

曰天下共苦秦久

矣相與戮力擊秦秦已破計功割地分土而王之以休

士卒今漢王復興兵而東侵人之分奪人之地已破三

秦引兵出關收諸侯之兵以東擊楚其意非盡吞天下

者不休其不知厭足如是甚也且漢王不可必身居項

王掌握中數矣

正義數色廣反

項王憐而活之然得脫輒倍約

復擊項王其不可親信如此今足下雖自以與漢王為
厚交為之盡力用兵終為之所禽矣足下所以得須臾
至今者以項王尚存也當今二王之事權在足下足下
右投則漢王勝左投則項王勝項王今日亡則次取足
下足下與項王有故何不反漢與楚連和三分天下王
之今釋此時而自必於漢以擊楚且為智者固若此乎

韓信謝曰臣事項王官不過郎中位不過執戟

集解張晏曰郎

中宿衛執戟之人也

言不聽畫不用故倍楚而歸漢漢王授我上

將軍印予我數萬衆解衣衣我推食食我言聽計用故

吾得以至於此夫人深親信我我倍之不祥雖死不易

幸為信謝項王武涉已去齊人蒯通知天下權在韓信

欲為奇策而感動之以相人說韓信曰僕嘗受相人之

術韓信曰先生相人何如對曰貴賤在於骨法憂喜在

於容色成敗在於決斷以此參之萬不失一韓信曰善

先生相寡人何如對曰願少間信曰左右去矣通曰相

君之面不過封侯又危不安相君之背貴乃不可言

集解

張晏曰背畔則大貴韓信曰何謂也蒯通曰天下初發難也俊雄

豪桀連號一呼天下之士雲合霧集魚鱗雜遝燦至風

起當此之時憂在亡秦而已今楚漢分爭使天下無罪

之人肝膽塗地父子暴骸骨於中野不可勝數楚人起

彭城轉鬪逐北至於滎陽乘利席卷威震天下然兵困

於京索之間迫西山而不能進者三年於此矣漢王將

數十萬之衆距鞏雒阻山河之險一日數戰無尺寸之

功折北不救

集解張晏曰折
衄敗也北奔北

敗滎陽傷成臯

集解張晏
曰於成臯

傷胃也臣瓚
曰謂軍折傷

遂走宛葉之間此所謂智勇俱困者也夫

銳氣挫於阻塞而糧食竭於內府百姓罷極怨望容容

無所倚以臣料之其勢非天下之賢聖固不能息天下

之禍當今兩主之命縣於足下足下為漢則漢勝與楚

則楚勝臣願披腹心輸肝膽效愚計恐足下不能用也

誠能聽臣之計莫若兩利而俱存之三分天下鼎足而

居其勢莫敢先動夫以足下之賢聖有甲兵之衆據彊

齊從燕趙出空虛之地而制其後因民之欲西鄉

正義鄉音

向齊國在東故曰西向也

為百姓請命

正義止楚漢之戰闔士卒亡故故云請命

則天下

風走而響應矣孰敢不聽割大弱彊以立諸侯諸侯已

立天下服聽而歸德於齊案齊之故有膠泗之地懷諸

侯之德深拱揖讓則天下之君王相率而朝於齊矣蓋

聞天與弗取反受其咎時至不行反受其殃願足下熟

慮之韓信曰漢王遇我甚厚載我以其車衣我以其衣

食我以其食吾聞之乘人之車者載人之患衣人之衣者懷人之憂食人之食者死人之事吾豈可以鄉利倍義乎蒯生曰足下自以為善漢王欲建萬世之業臣竊以為誤矣始常山王成安君為布衣時相與為刎頸之交後爭張廩陳澤之事二人相怨常山王背項王奉項嬰頭而竄逃歸於漢王漢王借兵而東下殺成安君泯水之南頭足異處卒為天下笑此二人相與天下至驩也然而卒相禽者何也患生於多欲而人心難測也今

足下欲行忠信以交於漢王必不能固於二君之相與也而事多大於張廩陳澤故臣以為足下必漢王之不危已亦誤矣大夫種范蠡存亡越霸句踐立功成名而身死亡野獸已盡而獵狗亨夫以交友言之則不如張耳之與成安君者也以忠信言之則不過大夫種范蠡之於句踐也此二人者足以觀矣願足下深慮之且臣聞勇畧震主者身危而功蓋天下者不賞臣請言大王功畧足下涉西河虜魏王禽夏說引兵下井陘誅成安

君徇趙脅燕定齊南摧楚人之兵二十萬東殺龍且西鄉以報此所謂功無二於天下而畧不世出者也今足下戴震主之威挾不賞之功歸楚楚人不信歸漢漢人震恐足下欲持是安歸乎夫勢在人臣之位而有震主之威名高天下竊為足下危之韓信謝曰先生且休矣吾將念之後數日蒯通復說曰夫聽者事之候也計者事之機也聽過計失而能久安者鮮矣聽不失一二者不可亂以言計不失本末者不可紛以辭夫隨廝養之

役者失萬乘之權守僖石之祿者

集解晉灼曰楊雄方言海岱之間名嬰為

僖石石斗也蘇林曰齊人名小嬰為僖石如今受鮎魚石嬰不過一二石耳一說一僖與一斛之餘索隱僖音

都濫反石斗也蘇林

解為得之鮎音胎闕卿相之位故知者決之斷也疑

者事之害也審毫釐之小計遺天下之大數智誠知之

決弗敢行者百事之禍也故曰猛虎之猶豫不若蜂蠆

之致螫

正義音適

騏驥之跼蹐

集解徐廣曰蹐一作躅也

不如駕馬之安

步孟賁之狐疑不如庸夫之必至也雖有舜禹之智吟

而不言不如瘖聵之指麾也

索隱鄒氏吟音巨陰反又音琴

此言貴能

行之夫功者難成而易敗時者難得而易失也時乎時

不再來願足下詳察之韓信猶豫不忍倍漢又自以為

功多漢終不奪我齊遂謝蒯通蒯通說不聽已詳狂為

巫集解徐廣曰一本遂不用蒯通蒯通曰夫迫於細苛不可與圖大事拘於臣虜者固無君王之意說不聽

因去佯狂也索隱案漢書及戰國策皆有此文漢王之困固陵用張良計召齊

王信遂將兵會垓下項羽已破高祖襲奪齊王軍集解徐廣

曰以齊為平原漢五年正月徙齊王信為楚王都下邳

千乘東萊齊郡

信至國召所從食漂母賜千金集解張華曰漂母家在泗口南岸及下

鄉南昌亭長賜百錢曰公人也為德不卒召辱已之

少年今出袴下者以為楚中尉告諸將相曰此壯士也

方辱我時我寧不能殺之邪殺之無名故忍而就於此

項王亡將鍾離昧家在伊廬

集解徐廣曰東海胸縣有伊廬鄉駟案韋昭曰今中

廬縣索隱徐注出司馬彪郡國志正義括地志云中廬在義清縣北二十里本春秋廬戎之國也秦謂之伊廬漢為中廬縣項羽之將鍾離昧家在焉素與信善項王死後亡歸信漢王

怨昧聞其在楚詔楚捕昧信初之國行縣邑陳兵出入

漢六年人有上書告楚王信反高帝以陳平計天子巡

狩會諸侯南方有雲夢發使告諸侯會陳吾將游雲夢
實欲襲信信弗知高祖且至楚信欲發兵反自度無罪
欲謁上恐見禽人或說信曰斬昧謁上上必喜無患信
見昧計事昧曰漢所以不擊取楚以昧在公所若欲捕
我以自媚於漢吾今日死公亦隨手亡矣乃罵信曰公
非長者卒自剄信持其首謁高祖於陳上令武士縛信
載後車信曰果若人言狡兔死良狗亨

集解張晏曰狡
猶猶索隱吳越

春秋作郊兔戰國策曰
東郭逵海內狡兔也

高鳥盡良弓藏敵國破謀臣亡

天下已定我固當亨上曰人告公反遂械繫信至雒陽
赦信罪以為淮陰侯信知漢王畏惡其能常稱病不朝
從信由此日怨望居常鞅鞅羞與絳灌等列信常過樊
將軍噲噲跪拜送迎言稱臣曰大王乃肯臨臣信出門
笑曰生乃與噲等為伍上常從容與信言諸將能不各
有差上問曰如我能將幾何信曰陛下不過能將十萬
上曰於君何如曰臣多多而益善耳上笑曰多多益善
何為為我禽信曰陛下不能將兵而善將將此乃信之

所以為陛下禽也且陛下所謂天授非人力也陳豨拜

為鉅鹿守

集解徐廣曰表云為趙相國將兵守代也

辭於淮陰侯淮陰侯挈

其手辟左右與之步於庭仰天歎曰子可與言乎欲與
子有言也豨曰唯將軍令之淮陰侯曰公所居天下精
兵處也而公陛下之信幸臣也人言公之畔陛下必不
信再至陛下乃疑矣三至必怒而自將吾為公從中起
天下可圖也陳豨素知其能也信之曰謹奉教漢十一
年陳豨果反上自將而徃信病不從陰使人至豨所曰

弟舉兵吾從此助公信乃謀與家臣夜詐詔赦諸官徒

奴欲發以襲吕后太子部署已定待獬報其舍人得罪

於信

索隱案晉灼曰楚漢春秋云謝公也姚氏案功臣表云悼陽侯樂說淮陰舍人告信反者未知孰是

信因欲殺之舍人弟上變告信欲反狀於吕后吕后欲

召恐其黨不就乃與蕭相國謀詐舍人從上所來言獬

已得死列侯羣臣皆賀相國紿信曰雖疾強入賀信入

吕后使武士縛信斬之長樂鍾室

正義長樂宮懸鍾之室

信方斬

曰吾悔不聽蒯通之計乃為兒女子所詐豈非天哉遂

夷信三族高祖已從絺軍來至見信死且喜且憐之問
信死亦何言呂后曰信言恨不用蒯通計高祖曰是齊
辯士也乃詔齊捕蒯通蒯通至上曰若教淮陰侯反乎
對曰然臣固教之豎子不用臣之策故令自夷於此如
彼豎子用臣之計陛下安得而夷之乎上怒曰亨之通
曰嗟乎冤哉亨也上曰若教韓信反何冤對曰秦之網
絕而維弛山東大擾異姓並起英俊烏集秦失其鹿天
下共逐之

集解張晏曰以鹿喻帝位也

於是高材疾足者先得焉跬

之狗吠堯堯非不仁狗固吠非其主當是時臣唯獨知
韓信非知陛下也且天下銳精持鋒欲為陛下所為者
甚衆顧力不能耳又可盡亨之邪高帝曰置之乃釋通
之罪

太史公曰吾如淮陰淮陰人為余言韓信雖為布衣時
其志與衆異其母死貧無以葬然乃行營高敞地令其
旁可置萬家余視其母冢良然假令韓信學道謙讓不
伐已功不矜其能則庶幾哉於漢家勲可以比周召太

公之徒後世血食矣不務出此而天下已集乃謀畔逆
夷滅宗族不亦宜乎

索隱述贊曰君臣一體自古所難相國深薦策拜登壇
沉沙決水拔幟傳殄與漢漢重歸楚楚安三分不
議偽遊
可嘆

史記卷九十二

史記卷九十二考證

淮陰侯列傳楚數使奇兵渡河擊趙○

臣照

按風后握

奇經四正四奇其餘握奇說者曰握奇即下文所云
游兵也此奇兵亦是此類猶言餘兵非奇正之奇乃
奇偶之奇耳

齊人蒯通○顧炎武曰先云范陽辨士蒯通後云齊人
蒯通一傳互異

容容無所倚○顧炎武曰容容即顯顯字

遂謝蒯通索隱按漢書及戰國策皆有此文○

臣照按

戰國策安得有韓信蒯通之事索隱誤

史記卷九十二考證

史記卷九十三

漢 太 史 令司馬遷 撰

宋中郎外兵曹參軍裴駙集解

唐國子博士弘文館學士司馬貞索隱

唐諸王侍讀率府長史張守節正義

韓王信盧綰列傳第三十三

韓王信者

集解徐廣曰一云信都索隱楚漢春秋云韓王信都恐謬也諸書不言有韓信都案韓王

信初為韓司徒後訛云申

故韓襄王孽孫也

集解張晏曰孺子為

徒因誤以為韓王名耳

孽索隱何休注公羊以為孽賤子猶樹之

有孽生也漢書晁錯云孽子悼惠王是也

及項梁之立楚後懷王也燕齊趙魏皆已前王唯韓無

有後故立韓諸公子橫陽君成為韓王

集解徐廣曰二年六月也都陽

翟正義故橫城在宋州宋城縣西南三十里

欲以撫定韓故地項梁敗死定

陶成犇懷王沛公引兵擊陽城

正義河南縣也

使張良以韓司

徒降下韓故地

集解徐廣曰他本多作申徒申與司聲相近字由此雜亂耳今有申徒云是司

徒之後言司

得信以為韓將將其兵從沛公入武關沛

聲轉為申

公立為漢王韓信從入漢中廼說漢王曰項王王諸將
近地而王獨遠居此此左遷也士卒皆山東人跂而望
歸及其鋒東嚮集解文穎曰鋒銳欲東向索隱跂起踵也鄭氏云鋒軍中將士氣鋒韋昭曰其
氣鋒銳欲東也可以爭天下漢王還定三秦廼許信為
正義跂音歧

韓王先拜信為韓太尉將兵畧韓地項籍之封諸王皆
就國韓王成以不從無功不遣就國更以為列侯集解徐廣

曰元年十一月誅成駒

案漢書曰封為穰侯及聞漢遣韓信畧韓地廼令故

項籍游吳時吳令鄭昌為韓王以距漢

正義項籍在吳時昌為吳縣令

漢二年韓信畧定韓十餘城漢王至河南韓信急擊韓

王昌陽城昌降漢王廼立韓信為韓王

集解徐廣曰二年十一月

常

將韓兵從三年漢王出滎陽韓王信周苛等守滎陽及

楚敗滎陽信降楚已而得亡復歸漢漢復立以為韓王

竟從擊破項籍天下定五年春遂與剖符為韓王王潁

川明年春

集解徐廣曰即五年之二月駢案漢書曰六年春

上以韓信材武所

王北近鞏洛南迫宛葉東有淮陽皆天下勁兵處廼詔

徙韓王信王太原以北備禦胡都晉陽信上書曰國被

邊

集解李奇曰被音被馬反

匈奴數入晉陽

正義并州

去塞遠請治馬邑

正義朔州

上許之信乃徙泊馬邑秋匈奴冒頓大圍信

索隱冒音

墨又音莫報反

信數使使胡求和解漢發兵救之疑信數間使

有二心使人責讓信信恐誅因與匈奴約共攻漢反以

馬邑降胡擊太原七年冬上自往擊破信軍銅鞮

正義潞州

縣

斬其將王喜信亡走匈奴與其將白土人

集解張晏曰白土縣

名屬上郡

冒丘臣王黃等立趙苗裔趙利為王復收信敗散

兵而與信及冒頓謀攻漢匈奴使左右賢王將萬餘騎

與王黃等屯廣武以南

正義廣武故城在代州鴈門縣界也

至晉陽與漢

兵戰漢大破之追至于離石

正義石州縣

後復破之匈奴復

聚兵樓煩

正義鴈門郡樓煩縣

西北漢令車騎擊破匈奴匈奴常

敗走漢乘勝追北聞冒頓居代上谷

正義今鵠州

高皇帝居

晉陽使人視冒頓還報曰可擊上遂至平城

正義朔州定襄縣是

也上出白登

集解服虔曰白登臺名去平城七里如淳曰平城旁之高也若丘陵也索隱姚氏案

北疆記桑乾河北有白登山冒頓圍漢高之所今猶有壘壁

匈奴騎圍上上乃使人

厚遺閼氏

正義閼於連反又音燕氏音支單于嫡妻號若皇后

閼氏乃說冒頓曰

今得漢地猶不能居且兩主不相厄居七日胡騎稍引

去時天大霧漢使人往來胡不覺護軍中尉陳平言上

曰胡者全兵

集解駟案漢書音義曰言唯弓矛無雜杖也

請令彊弩傳兩矢

外嚮

索隱傳音附

徐行出圍入平城漢救兵亦到胡騎遂解

去漢亦罷兵歸韓信為匈奴將兵往來擊邊漢十年信

令王黃等說誤陳豨十一年春故韓王信復與胡騎入

居參合

集解蘇林曰代地也正義故城在朔州定襄縣北

距漢漢使柴將軍擊

之

集解鄧展曰柴奇也索隱應劭曰柴武鄧展云柴奇晉灼云奇武之子應劭說為得此時奇未為將

遺

信書曰陛下寬仁諸侯雖有畔亡而復歸輒復故位號
不誅也大王所知今王以敗亡走胡非有大罪急自歸
韓王信報曰陛下擢僕起閭巷南面稱孤此僕之幸也
滎陽之事僕不能死囚於項籍此一罪也及寇攻馬邑
僕不能堅守以城降之此二罪也今反為寇將兵與將

軍爭一旦之命此三罪也夫種蠡無一罪身死亡

集解
文穎

曰大夫種
范蠡也

今僕有三罪於陛下而欲求活於世此伍子

胥所以償於吳也

索隱蘇林曰償音奮張晏曰償償什
也正義信知歸漢必死故引子胥以

為今僕亡匿山谷間旦暮乞貸蠻夷僕之思歸如痿人

辭
不忘起

索隱痿音耳誰反舊音耳睡反於義為疎張揖云痿不能行哀紀云帝即位痿痺是也

盲

者不忘視也勢不可耳遂戰柴將軍屠參合斬韓王信

信之入匈奴與太子俱及至顏當城

集解駟案漢書音義曰縣名韋昭曰

在匈奴地生子因名曰顏當韓太子亦生子命曰嬰至孝文

十四年顏當及嬰率其衆降漢漢封顏當為弓高侯

集解

駟案地理志河間有弓高縣也索隱漢書功臣表屬樂陵正義滄州縣

嬰為襄城侯

索隱案服

虔云縣名功臣表屬魏都

吳楚軍時弓高侯功冠諸將

集解徐廣曰諡曰壯傳

子至孫孫無子失侯嬰孫以不敬失侯

集解徐廣曰表云嬰子澤之元

朔四年不

敬國除

顏當孽孫韓嫣

集解駟案漢書音義曰音鄢陵之鄢索隱音偃又一言反

又休延反並通

貴幸名富顯於當世其弟說再封數稱將軍卒

為案道侯子代

集解徐廣曰名長君

歲餘坐法死後歲餘說孫曾

集解徐廣曰長君之子也

索隱案博物志字李君也

拜為龍頤侯續說後

索隱頤五格反

又作頤音洛龍頤縣名正義史記表衛青傳及漢書表

云韓說元朔五年從大將軍有功封龍頤侯以酎金坐

免元封元年擊東越有功封按道侯征和二年孫子曾

復封為龍頤侯漢書功臣表云武後元年說孫曾紹封

龍頤侯漢

表是也

盧綰者豐人也與高祖同里盧綰親與高祖太上皇相

愛

集解如淳曰
親謂父也

及生男高祖盧綰同日生里中持羊酒

賀兩家及高祖盧綰壯俱學書又相愛也里中嘉兩家
親相愛生子同日壯又相愛復賀兩家羊酒高祖為布
衣時有吏事辟匿盧綰常隨出入上下及高祖初起沛
盧綰以客從入漢中為將軍常侍中從東擊項籍以太
尉常從出入卧内衣被飲食賞賜羣臣莫敢望雖蕭曹
等特以事見禮至其親幸莫及盧綰綰封為長安侯長

安故咸陽也

正義秦咸陽在渭北長安在渭南蕭何起未央宮處也

漢五年冬以

破項籍廼使盧綰別將與劉賈擊臨江王共尉破之

集解

李奇曰

七月還從擊燕王臧荼臧荼降高祖已定天下

共敖子

諸侯非劉氏而王者七人欲王盧綰為羣臣缺望

集解如淳

曰缺音辭別之訣望猶怨也瓚曰缺謂相挾而怨望也韋昭曰缺猶冀也索隱缺望猶怨望也又音企韋昭音

冀

及虜臧荼廼下詔諸將相列侯擇羣臣有功者以為

燕王羣臣知上欲王盧綰皆言曰太尉長安侯盧綰常

從平定天下功最多可王燕詔許之漢五年八月廼立

盧綰為燕王諸侯王得幸莫如燕王漢十一年秋陳豨反代地高祖如邯鄲擊豨兵燕王綰亦擊其東北當是時陳豨使王黃求救匈奴燕王綰亦使其臣張勝於匈奴言豨等軍破張勝至胡故燕王臧荼子衍出亡在胡見張勝曰公所以重於燕者以習胡事也燕所以久存者以諸侯數反兵連不決也今公為燕欲急滅豨等已盡次亦至燕公等亦且為虜矣公何不令燕且緩陳豨而與胡和事寬得長王燕即有漢急可以安國張勝以

為然廼私令匈奴助猋等擊燕燕王綰疑張勝與胡反
上書請族張勝勝還具道所以為者燕王寤廼詐論他
人脫勝家屬使得為匈奴間而陰使范齊之陳猋所欲
令久亡

集解晉灼曰使陳猋久亡畔

連兵勿決漢十二年東擊黥布

猋常將兵居代漢使樊噲擊斬猋其裨將降言燕王綰
使范齊通計謀於猋所高祖使使召盧綰綰稱病上又
使辟陽侯審食其御史大夫趙堯往迎燕王因驗問左
右綰愈恐閉匿謂其幸臣曰非劉氏而王獨我與長沙

耳往年春漢族淮陰夏誅彭越皆呂后計今上病屬任
呂后呂后婦人專欲以事誅異姓王者及大功臣廼遂
稱病不行其左右皆亡匿語頗泄辟陽侯聞之歸具報
上上益怒又得匈奴降者降者言張勝亡在匈奴為燕
使於是上曰盧綰果反矣使樊噲擊燕燕王綰悉將其
宮人家屬騎數千居長城下候伺幸上病愈自入謝四
月高祖崩盧綰遂將其衆亡入匈奴匈奴以為東胡盧
王綰為蠻夷所侵奪常思復歸居歲餘死胡中高后時

盧綰妻子亡降漢會高后病不能見舍燕邸為欲置酒

見之高后竟崩不得見盧綰妻亦病死孝景中六年盧

綰孫他之

正義他徒何反

以東胡王降

集解如淳曰為東胡王來降也漢紀東胡烏丸

也封為亞谷侯

集解徐廣曰亞一作惡也正義漢表在河內

陳稀者宛朐人也

索隱地理志屬濟陰下又云梁人是褚先生之說異也正義宛朐曹州縣

也太史公云稀梁人按宛朐六國時屬梁

不知始所以得從及高祖七年冬

韓王信反入匈奴上至平城還廼封稀為列侯

集解徐廣曰功

臣表曰陳稀以特將將卒五百人前元年從起宛朐至霸上為侯以游擊將軍別定代已破臧荼封稀為陽夏

侯

以趙相國將監趙代邊兵邊兵皆屬焉穉常告歸過

趙趙相周昌見穉賓客隨之者千餘乘邯鄲官舍皆滿

穉所以待賓客如布衣交皆出客下

正義言屈已禮之不以富貴自尊大

穉還之代周昌廼求入見見上具言穉賓客盛甚擅兵

於外數歲恐有變上乃令人覆案穉客居代者財物諸

不法事多連引穉穉恐陰令客通使王黃舅丘臣所

正義

二人韓王信將

及高祖十年七月太上皇崩使人召穉穉稱病

甚九月遂與王黃等反自立為大王劫略趙代上聞廼

赦趙代吏人為豨所誑誤刼略者皆赦之上自往至邯鄲喜曰豨不南據漳水北守邯鄲知其無能為也趙相奏斬常山守尉曰常山二十五城豨反亡其二十城上問曰守尉反乎對曰不反上曰是力不足也赦之復以為常山守尉上問周昌曰趙亦有壯士可令將者乎對曰有四人四人謁上慢罵曰豎子能為將乎四人慙伏上封之各千戶以為將左右諫曰從入蜀漢伐楚功未徧行今此何功而封上曰非若所知陳豨反邯鄲以北

皆稀_有吾以羽檄徵天下兵

集解魏武帝奏事曰今邊有小警輒露檄揮羽飛羽

檄之意也駟案推此言則以鳥羽插檄書謂之羽檄取其急速若飛鳥也

未有至者今惟獨

邯鄲中兵耳吾胡愛四千戶封四人以尉趙子弟皆曰

善於是上曰陳稀將誰曰王黃曷丘臣皆故賈人上曰

吾知之矣廼各以千金購黃臣等十一年冬漢兵擊斬

陳稀將侯敞王黃於曲逆下

正義定州北平縣東南十五里蒲陰故城是也破

稀將張春于聊城

正義博州縣

斬首萬餘太尉勃入定太原

代地十二月上自擊東垣東垣不下卒罵上東垣降卒

罵者斬之不罵者黥之更命東垣為真定王黃曩丘臣

其麾下受購賞之皆生得以故陳稀軍遂敗上還至洛

陽上曰代居常山北趙廼從山南有之遠廼立子恒為

代王

集解徐廣曰
十一年正月

都中都

正義中都故城在汾州
平遙縣西南十二里

代鴈

門皆屬代高祖十二年冬樊噲軍卒追斬稀於靈丘

正義

蔚州

是

太史公曰韓信盧縮非素積德累善之世微一時權變
以詐力成功遭漢初定故得列地南面稱孤內見疑疆

大外倚蠻貊以為援是以日疏自危事窮智困卒赴匈奴豈不哀哉陳豨梁人其少時數稱慕魏公子及將軍守邊招致賓客而下士名聲過實周昌疑之疵瑕頗起懼禍及身邪人進說遂陷無道於戲悲夫夫計之生孰成敗於人也深矣

索隱述贊曰韓襄遺孽始從漢中割符南面徙邑北通顏當歸國龍頷有功盧綰親愛羣臣莫同舊燕是王東胡計窮

史記卷九十三

史記卷九十三考證

韓王信盧綰列傳韓王信者集解徐廣曰一云信都索
隱楚漢春秋云韓王信都恐謬也諸書不言有韓信
都按韓王信初為韓司徒後訛云申徒因誤以為韓
王名耳○羅璧識遺曰司馬遷班固漢史韓信傳贊
中皆稱兩韓信據其說韓王信古韓國之後項羽殺
成復立信為韓王都晉陽與淮陰侯不同劉知幾史
通闕遷固之繆曰韓王名信都古韓國後姓姬則名

信都者非姓韓亦不單名信二史不別姬韓兩姓且去韓王名下都字遂與淮陰侯韓信無辨余攷班馬誤姬為韓誠如劉說但謂韓王名信都劉說亦差按王充潜夫姓氏論云沛公起張良屬焉沛公使韓信略定韓地立橫陽君為韓王而拜良為信都又曰信都者司徒也或為勝徒漢功臣表云張良以廐將從起下邳以韓申都下韓楚漢春秋作信都信音申史記亦作韓申徒良傳直作韓司徒蓋信都勝徒皆司

徒之聲轉然則信都乃張良官名即非韓王名知幾之說亦未免繆尚何班馬責乎

韓信從入漢中廼說漢王曰○顧炎武曰韓王信說漢王語乃淮陰侯韓信語也以同姓名而誤

及高祖十年七月太上皇崩使人召絺○

臣照

按高紀

十年七月太上皇崩八月陳絺反韓信傳亦云漢十年信令王黃等說誤陳絺至淮陰傳則作十一年是時高祖固在邯鄲誅絺等未畢也馬遷誤耶抑別有

意也田叔傳亦云陳豨反代漢十年高祖往誅之
自立為大王○陳子龍曰本代王訛為大者北音相誤
也

不罵者黥之○高紀云不罵者原之

史記卷九十三考證

史記卷九十四

漢 太 史 令司馬遷 撰

宋中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

田儋列傳第三十四

田儋者狄人也

集解徐廣曰今樂安臨濟縣也正義淄州高苑縣西北北狄故縣城

故齊

王田氏族也儋從弟田榮榮弟田橫皆豪宗彊能得人

索隱儋子市從弟榮榮子廣榮弟橫各遞為王榮并王三齊

陳涉之初起王楚也使

周市略定魏地北至狄狄城守田儋詳為縛其奴從少

年之廷欲謁殺奴

集解服虔曰古殺奴婢皆當告官儋欲殺令故詐縛奴而以謁也

見

狄令因擊殺令而召豪吏子弟曰諸侯皆反秦自立齊

古之建國儋田氏當王遂自立為齊王

集解徐廣曰二世元年九月也

發兵以擊周市周市軍還去田儋因率兵東略定齊地

秦將章邯圍魏王咎於臨濟急魏王請救於齊齊王田

儋將兵救魏

集解徐廣曰
二年六月

章邯夜銜枚擊大破魏軍殺

田儋於臨濟下儋弟田榮收儋餘兵走東阿齊人聞王
田儋死廼立故齊王建之弟田假為齊王田角為相田
間為將以距諸侯田榮之走東阿章邯追圍之項梁聞
田榮之急廼引兵擊破章邯軍東阿下章邯走而西項
梁因追之而田榮怒齊之立假廼引兵歸擊逐齊王假
假亡走楚齊相角亡走趙角弟田間前求救趙因留不
敢歸田榮乃立田儋子市為齊王

集解徐廣曰
二年八月

榮相之

田橫為將平齊地項梁既追章邯章邯兵益盛項梁使
使告趙齊發兵共擊章邯田榮曰使楚殺田假趙殺田
角田間廼肯出兵楚懷王曰田假與國之王窮而歸我
殺之不義趙亦不殺田角田間以市於齊齊曰蝮螫手
則斬手螫足則斬足何者為害於身也

集解應劭曰蝮一名虺螫人手

足則割去其肉不然則致死索隱蝮音芳伏反螫音臍又音釋正義按蝮毒蛇長二三丈嶺南北有之虺長一二尺頭腹皆一說文云虺博三寸今田假田角田間於

首大如擘擘手大指也

音步歷反

楚趙非直手足戚也

集解文穎曰言將亡身非手足憂也瓚曰於楚趙非手足之親

何

故不殺且秦復得志於天下則齟齬用事者墳墓矣

集解

如淳曰齟齬猶齬齬索隱齬音蟻齬音紇齬側齒齬也正義按秦重得志非但辱身墳墓亦發掘矣若子胥鞭荆平王墓一云墳墓言死也

楚趙不聽齊亦怒終不肯出兵章邯果

敗殺項梁破楚兵楚兵東走而章邯渡河圍趙於鉅鹿項羽往救趙由此怨田榮項羽既存趙降章邯等西屠咸陽滅秦而立侯王也廼徙齊王田市更王膠東治即墨齊將田都從共救趙因入關故立都為齊王治臨淄故齊王建孫田安項羽方渡河救趙田安下濟北數城

引兵降項羽項羽立田安為濟北王治博陽田榮以負
項梁不肯出兵助楚趙攻秦故不得王趙將陳餘亦失
職不得王二人俱怨項王項王既歸諸侯各就國田榮
使人將兵助陳餘令反趙地而榮亦發兵以距擊田都
田都亡走楚田榮留齊王市無令之膠東市之左右曰
項王彊暴而王當之膠東不就國必危市懼迺亡就國
田榮怒追擊殺齊王市於即墨還攻殺濟北王安於是
田榮迺自立為齊王盡并三齊之地

索隱田市王膠東
田都王齊田安王

濟北項王聞之大怒迺北伐齊齊王田榮兵敗走平原集解

徐廣曰三年正月正義平原德州也平原人殺榮項王遂燒夷齊城郭所

過者盡屠之

集解徐廣曰立故王田假也

齊人相聚畔之榮弟橫收

齊散兵得數萬人反擊項羽於城陽

集解徐廣曰假走楚楚殺之正義城

陽濮州雷澤是

而漢王率諸侯敗楚入彭城項羽聞之迺釋齊

而歸擊漢於彭城因連與漢戰相距滎陽以故田橫復

得收齊城邑

集解徐廣曰四月

立田榮子廣為齊王而橫相之

專國政政無巨細皆斷於相橫定齊三年漢王使酈生

往說下齊王廣及其相國橫橫以為然解其歷下軍漢

將韓信引兵且東擊齊齊初使華無傷田解軍於歷下

以距漢漢使至廼罷守戰備縱酒且遣使與漢平漢將

韓信已平趙燕用蒯通計度平原襲破齊歷下軍因入

臨淄齊王廣相橫怒以酈生賣已而亨酈生齊王廣東

走高密

集解徐廣曰
高一作假

相橫走博陽守相田光走城陽將

軍田既軍於膠東楚龍且救齊齊王與合軍高密漢將

韓信與曹參破殺龍且

集解徐廣曰
四年十一月

虜齊王廣漢將灌

嬰追得齊守相田光至博陽而橫聞齊王死自立為齊

王還擊嬰嬰敗橫之軍於贏下

集解晉灼曰泰山贏縣也正義故贏城在兗州

博城縣東北百里

田橫亡走梁歸彭越彭越是時居梁地中立

且為漢且為楚韓信已殺龍且因令曹參進兵破殺田

既於膠東使灌嬰破殺齊將田吸於千乘

正義千乘故城在淄州高

苑縣北二十里

韓信遂平齊乞自立為齊假王

集解徐廣曰二月也

漢

因而立之後歲餘漢滅項籍漢王立為皇帝以彭越為

梁王田橫懼誅而與其徒屬五百餘人入海居島中

集解

韋昭曰海中山曰島正義按海州東海縣有島山去岸八十里

高帝聞之以為田橫兄

弟本定齊齊人賢者多附焉今在海中不收後恐為亂
廼使使赦田橫罪而召之田橫因謝曰臣亨陛下之使
酈生今聞其弟酈商為漢將而賢臣恐懼不敢奉詔請
為庶人守海島中使還報高皇帝廼詔衛尉酈商曰齊
王田橫即至人馬從者敢動搖者致族夷廼復使使持
節具告以詔商狀曰田橫來大者王小者廼侯耳不來
且舉兵加誅焉田橫廼與其客二人乘傳詣維陽

集解
如淳

曰四馬下足為乘傳

未至三十里至尸鄉廐置

集解應劭曰尸鄉在偃師瓚曰廐置

置馬以傳驛也

橫謝使者曰人臣見天子當洗沐止留謂其客

曰橫始與漢王俱南面稱孤今漢王為天子而橫廼為

亡虜而北面事之其耻固已甚矣且吾亨人之兄與其

弟併肩而事其主縱彼畏天子之詔不敢動我我獨不

媿於心乎且陛下所以欲見我者不過欲一見吾面貌

耳今陛下在洛陽今斬吾頭馳三十里間形容尚未能

敗猶可觀也遂自剄令客奉其頭

正義奉音捧

從使者馳奏

之高帝高帝曰嗟乎有以也夫起自布衣兄弟三人更

王豈不賢乎哉為之流涕而拜其二客為都尉發卒二

千人以王者禮葬田橫

正義齊田橫墓在偃師西十五里崔豹古今注云薤露蒿里送

哀歌也出田橫門人橫自殺門人傷之而作悲歌言人命如薤上露易晞滅至李延年乃分為二曲薤露送王公貴人蒿里送士大夫庶人使挽逝者歌之俗呼為挽歌既葬二客穿其冢旁孔皆

自剄下從之高帝聞之廼大驚以田橫之客皆賢吾聞其餘尚五百人在海中使使召之至則聞田橫死亦皆自殺於是廼知田橫兄弟能得士也

太史公曰甚矣蒯通之謀亂齊驕淮陰其卒亡此兩人

集解駟案

韓信田橫

蒯通者善為長短說

索隱言欲令此事長則長說之短則短說之故

戰國策亦名曰

論戰國之權變為八十一首

集解駟案漢書曰號

短長書是也

為雋永永一作求索隱

書名也雋音松充反

通善齊人安期生安期生嘗干

項羽項羽不能用其策已而項羽欲封此兩人兩人終

不肯受亡去田橫之高節賓客慕義而從橫死豈非至

賢余因而列焉無不善畫者莫能圖何哉

索隱言天下非無善畫之

人而不知圖畫田橫及其黨慕義死

節之事何故哉歎畫人不知畫此也

索隱述贊曰秦項之際天下交兵六國樹黨自置豪
英田儋殞冠立市相榮楚封王假齊破酈生兄弟更
王海島
傳聲

史記卷九十四

史記卷九十四考證

田儋列傳非直手足戚也何故不殺且秦復得志於天下則齟齬用事者墳墓矣正義按秦重得志非但辱身墳墓亦發掘矣若子胥鞭荊平王墓一云墳墓言死也○董份曰斬手足則戚甚矣今三田於楚趙無親非特斬手足之戚也而使秦得志則墳墓齟齬非但蝮螫之害身也故曰何為不殺注全謬

反擊項羽於城陽正義城陽濮州雷澤是○顧炎武曰

正義以為濮州雷澤縣非也漢書城陽郡治莒史記
呂后紀言齊王乃上陽城之郡孝文紀言以齊劇郡
立朱虛侯章為城陽王而淮陰侯傳言擊殺龍且於
濰水上齊王廣亡去信遂追北至城陽皆此地按戰
國策貂勃對襄王曰昔王不能守王之社稷走而之
城陽之山中安平君以敝卒七千禽敵反千里之齊
當是時闔城陽而王天下莫之能止然為棧道本閤
而迎王與后於城陽之山中王乃復反子臨百姓則

古齊時已名城陽矣

史記卷九十四考證

謹案卷九十二第五頁後三行齊趙亦反漢與楚
和刊本亦訛欲據下云擊趙代擊齊則齊趙此
時已反漢和楚不得言欲今改

第七頁後七行漢書作萆山說文云萆蔽也从竹
卑聲刊本萆俱訛草考漢書亦訛據索隱作說
文改

第十頁後六行劉氏依劉逵案劉氏疑是裴氏指
裴駟

第十二頁後七行東北至都昌入海刊本都昌訛
昌都據地理志改

第十五頁前四行連號一呼連字疑當作建

第十八頁後五行案漢書及戰國策皆有此文刊
本漢書下衍一因字今刪

卷九十三第八頁後五行地理志屬濟陰刊本濟
訛齊據地理志改

第八頁後八行陳豨以特將將卒五百人前元年

從起宛朐至霸上為侯刊本特將下脫將字從
下脫起字據功臣侯表增

第九頁前八行立為大王案大字當作代

第十頁前七行破稀將張春於聊城此聊城當是
廓城即戰國策呂不韋所謂秦子異人質於趙
處於廓城者非魯連射書燕將之聊城也舊本
俱誤姑仍之

卷九十四第五頁後一行海州東海縣有島山諸

本下海字俱訛北據唐書地理志改

總校官庶吉士臣侍
校對官檢討臣郭寅
膳錄監生臣牛繼祖

總校官庶吉士臣侍朝

校對官檢討臣郭寅

膳錄監生臣牛繼祖

欽定四庫全書薈要

史部
史記卷九十五

詳校官主事銜臣徐以坤



史記卷九十五

漢 太 史 令司馬遷 撰

宋 中郎外兵曹參軍裴駰集解

唐國子博士弘文館學士司馬貞索隱

唐諸王侍讀率府長史張守節正義

樊鄴滕灌列傳第三十五

舞陽侯樊噲者沛人也

正義舞陽在許州葉縣東十里
噲音快又吉外反沛徐州縣

以屠狗爲事

正義時人食狗亦與羊豕同故噲專屠以賣之

與高祖俱隱初從

高祖起豐攻下沛高祖爲沛公以噲爲舍人從攻胡陵

方與

正義房預二音

還守豐擊泗水監豐下

索隱案監者秦時御史監郡也豐下

豐縣之下也正義泗水郡名

破之復東定沛破泗水守薛西

索隱謂破其守

於薛縣之西也

與司馬尼戰碭東

集解張晏曰秦司馬尼又碭宋州縣將章邯司馬尼

也卻敵斬首十五級賜爵國大夫

集解文穎曰即官大夫也正義爵第六級

也常從沛公擊章邯軍濮陽攻城先登斬首二十三級

賜爵列大夫

集解文穎曰即公大夫爵第七

復常從從攻城陽

集解徐廣曰年

表二年七月破秦軍濮陽東屠城陽也正
義按城陽近濮陽而漢書作陽城大錯悞
先登下戶牖

正義戶牖汴州陳留縣東
北九十一里東昏故城是
破李由軍斬首十六級賜上

間爵

集解孟康曰不在二十爵中如執圭執帛比也如淳曰間或作聞呂氏春秋曰魏文侯東勝齊於長

城天子賞文侯以上間爵索隱張晏云得徑上聞晉灼曰名通於天子也如淳引呂氏春秋證上間音中間之

間

從攻圍東郡守尉於成武

正義曹州縣

郤敵斬首十四級

捕虜十一人賜爵五大夫從擊秦軍出亳南

索隱案亳湯所都今

河南偃師有湯亳是正義亳故城在宋州穀熟縣西南四十里

河間守軍於扛里

正義地名

近城

破之擊破趙賁軍開封

正義汴州縣

北以郤敵先登斬

候一人首六十八級捕虜二十七人賜爵卿從攻破楊

熊軍於曲遇

索隱音齟顯邑名也正義曲丘朋友過牛恭反鄭州中牟縣有曲遇聚

攻宛

陵

索隱地理志屬河南正義宛陵故城在鄭州新鄭縣東北三十八里

先登斬首八級捕

虜四十四人賜爵封號賢成君

集解徐廣曰時賜爵有執帛執圭又有賜爵封

而加美名以爲號也又有功則賜封列侯駟案張晏曰食祿比封君而無邑璿曰秦制列侯乃有封爵也索隱小顏云楚漢之際權說寵榮假其位號或得邑地或空受爵此例多矣約以秦制於義不通

從攻長

社轅轅

正義許州理縣也轅轅關在轅氏縣東南三十里

絕河津

正義古平陰津在河南府

東北五十里也

東攻秦軍於尸南

正義在

攻秦軍於犍

正義在汝州魯

山縣東南

破南陽守齧於陽城東攻宛城先登西至酈

正義酈音

酈在鄧州新城縣西北四十里

以卻敵斬首二十四級捕虜四十人賜

重封

集解張晏曰益祿也如淳曰正爵名也瓚曰增封也索隱張晏臣瓚義亦近是如淳非也小顏以爲

重封者兼二號蓋爲得也

攻武關至霸上斬都尉一人首十級捕虜

百四十六人降卒二千九百人項羽在戲下欲攻沛公

沛公從百餘騎因項伯面見項羽謝無有閉關事項羽

既饗軍士中酒

集解張晏曰酒酣也

亞父謀欲殺沛公令項莊拔

劍舞坐中欲擊沛公項伯常肩蔽之時獨沛公與張良

得入坐樊噲在營外聞事急乃持鐵盾入到營營衛止

噲噲直撞入

集解 樊案漢書音義曰音撞鐘正義撞直江反

立帳下

集解 徐廣曰一本作

立帷下瞋目而視皆皆血出

項羽目之問爲誰張良曰沛公參乘樊

噲項羽曰壯士賜之卮酒彘肩噲既飲酒拔劍切肉食

盡之項羽曰能復飲乎噲曰臣死且不辭豈特卮酒乎

且沛公先入定咸陽暴師霸上以待大王

正義時羽未爲王史記追書

大王今日至聽小人之言與沛公有隙臣恐天下解

正義

紀賁反至此爲絕句

心疑大王也項羽默然沛公如廁麾樊噲去

既出沛公留車騎獨騎一馬與樊噲等四人步從從間道山下歸走霸上軍而使張良謝項羽項羽亦因遂已無誅沛公之心矣是日微樊噲莽入營謂讓項羽沛公

事幾殆

索隱謂責也亦或作譙正義幾音祈

明日項羽入屠咸陽立沛公

爲漢王漢王賜噲爵爲列侯號臨武侯

正義桂陽臨武縣

遷爲

郎中從入漢中還定三秦別擊西丞白水北

集解徐廣曰隴西有

西縣白水在武都緄案如淳曰皆地名也晉灼曰白水今廣魏縣也地理志無西丞似秦將名索隱案西謂隴西之西縣白水水名出武都經西縣東南流言噲擊西縣之丞在白水之北耳徐廣等說皆非也正義括地志

云白馬水源出文州曲水縣西南會經孫山下

雍輕車騎於雍南破之

正義上雍於拱

反

從攻雍釐城先登擊章平軍好時

集解駟案釐音胎索隱案雍卽扶風

雍縣釐音台卽后稷所封今之武功故釐城是章平卽章邯子也

攻城先登陷陣斬縣

令丞各一人首十一級虜二十人遷郎中騎將從擊秦

軍騎壤東

索隱小顏亦以爲今之地名正義壤鄉在武功縣東南二十里

卻敵遷爲將

軍攻趙賁下郿

正義岐州縣

槐里柳中咸陽灌廢丘最

集解李奇

曰以水灌廢丘也張晏曰最功第一也晉灼曰京輔治華陰灌北也索隱案柳中卽細柳也在長安西也灌謂以水灌廢丘城陷其功最上也李奇曰廢丘卽槐里也上有槐里此又言者疑此是小槐里非也案文云攻趙

賁下郿槐里柳中咸陽總言所攻陷之邑別言以水灌
廢丘其功特最也何者初言槐里稱其新名後言功最
是重舉不欲再見其
至櫟陽正義雍州縣賜食邑杜之樊鄉

文故因舊稱廢丘也
索隱案杜陵有樊鄉三秦記曰長安正南山名秦
嶺谷名子午一名樊川一名郿宿樊鄉即樊川也從攻

項籍屠秦棗

索隱晉灼云檢地理志無秦棗功臣表則有秦棗侯清河有秦棗城小顏以爲攻項

籍屠秦棗合在河南非清河之城明矣今案續漢書郡
國志在濟陰宛胸也正義按其時項羽未度河北冀州

信都縣東北五十里秦棗非矣擊破王武程處軍於外黃攻鄒魯瑕丘

薛正義鄒兗州縣在州東南六十二里魯兗州曲阜縣瑕丘兗州縣薛在徐州滕縣界項羽敗漢

王於彭城盡復取魯梁地噲還至滎陽益食平陰二千

戶

正義平陰故城在
濟陽東北五里

以將軍守廣武一歲項羽引而東

從高祖擊項籍下陽夏

正義夏音假
陳州太康縣

虜楚周將軍卒四

千人圍項籍於陳

正義
陳州

大破之屠胡陵

正義在
兗州南

項籍既

死漢王爲帝以噲堅守戰有功益食八百戶從高帝攻

反燕王臧荼虜荼定燕地楚王韓信反噲從至陳取信

定楚

正義
徐州

更賜爵列侯與諸侯剖符世世勿絕食舞陽

號爲舞陽侯除前所食以將軍從高祖攻反韓王信於

代自霍人以往

正義先累反又蘇果反又山寨反杜預
云霍人晉邑也霍人當作後人地理志云

獲人縣屬太原郡括地志云獲人故城在代州繁時縣界也

至雲中

正義雲中郡縣今朔州善陽縣

北三百八十里定襄故城是也

與絳侯等共定之益食千五百戶因擊

陳豨與虜丘臣軍

集解徐廣曰豨一作寧字

戰襄國

正義邢州城

破柏人

正義邢州縣

先登降定清河常山凡二十七縣殘

集解張晏曰殘有所

殺也贊曰殘謂多所殺傷也孟子曰害義謂之殘

東垣遷爲左丞相破得荼母

叩尹潘軍於無終廣昌

正義在蔚州飛狐縣北七里

破豨別將胡人

王黃軍於代南因擊韓信軍於參合

正義在朔州定襄縣界

軍所

將卒斬韓信破豨胡騎橫谷

正義谷音缺蓋在代

斬將軍趙旣虜

代丞相馮梁守孫奮大將王黃將軍太卜太僕解福

正義

人姓名

等十人與諸將共定代鄉邑七十三其後燕王盧

綰反噲以相國擊盧綰破其丞相抵薊南

索隱抵音丁禮反抵訓至

一云抵者丞相之名

定燕地凡縣十八鄉邑五十一益食邑千三

百戶定食舞陽五千四百戶從斬首百七十六級虜二

百八十八人別破軍七下城五定郡六縣五十二得丞

相一人將軍十二人二千石以下至三百石十一人噲

以呂后女弟呂須爲婦生子伉故其比諸將最親先黥

布反時高祖嘗病甚惡見人臥禁中詔戶者無得入羣

臣羣臣絳灌等莫敢入十餘日噲乃排闥直入

正義宮中小門

大臣隨之上獨枕一宦者臥噲等見上流涕曰始陛下
與臣等起豐沛定天下何其壯也今天下已定又何憊
也且陛下病甚大臣震恐不見臣等計事顧獨與一宦
者絕乎且陛下獨不見趙高之事乎高帝笑而起其後
盧綰反高帝使噲以相國擊燕是時高帝病甚人有惡
噲黨於呂氏卽上一日宮車晏駕則噲欲以兵盡誅滅

戚氏趙王如意之屬高帝聞之大怒乃使陳平載絳侯

代將而卽軍中斬噲陳平畏呂后執噲詣長安至則高

祖已崩呂氏釋噲使復爵邑孝惠六年樊噲卒諡爲武

侯子伉代侯而伉母呂須亦爲臨光侯高后時用事專

權大臣盡畏之伉代侯九歲高后崩大臣誅諸呂呂須

嫪屬

索隱 嫪音菴

因誅伉舞陽侯中絕數月孝文帝旣立乃

復封噲他庶子市人爲舞陽侯復故爵邑市人立二十

九歲卒諡爲荒侯子他廣代侯六歲侯家舍人得罪他

廣怨之乃上書曰荒侯市人病不能爲人

正義言不能行人道令

其夫人與其弟亂而生他廣他廣實非荒侯子不當代

後詔下吏孝景中六年他廣奪侯爲庶人國除

索隱案漢書平

帝元始二年封增立孫之子

章爲舞陽侯邑千戶

曲周侯

正義故城在洛州曲周西南十五里

酈商者高陽人

索隱酈音歷高陽聚名屬

陳留正義雍州西南聚邑人也

陳勝起時商聚少年東西略人得數千

沛公略地至陳留六月餘

集解徐廣曰月表曰二世元年九月沛公起兵二世三年

二月襲陳留用酈食其策起兵至此十九月矣食其傳曰既說高帝已乃言其弟商使從沛公也索隱事與酈

生傳及年表小不同蓋史官意異也正義徐注非也言商先東西畧得數千人及沛公畧地至陳留商起兵乃

六月餘得四千人以將軍從高祖也

商以將卒四千人屬沛公於歧

索隱此地

名關蓋在河南陳鄭之界正義高紀云鄭食其說沛公襲陳留乃以食其爲廣野君鄭商爲將將陳留兵與偕攻開封鄭生傳云沛公引兵隨之乃下陳留爲廣陽君言其弟鄭商使將數千人從沛公西南畧地此傳云屬沛公於歧從攻長社案紀傳此說歧當與陳留高陽相近也從攻長社先登賜爵封

信成君從沛公攻緱氏絕河津破秦軍洛陽東從攻下

宛穰定十七縣別將攻旬關

集解綱案漢書音義曰漢中旬陽縣音詢索隱案在

漢中旬陽縣旬水上之關

定漢中項羽滅秦立沛公爲漢王漢王賜

商爵信成君以將軍爲隴西都尉別將定北地

正義
寧州上

郡

正義
郡州

破雍將軍馬氏

索隱馬音於然反氏音支縣名屬安定漢書云破章郎別將也

正義縣在涇州安定縣東四十里

周類軍枸邑

索隱枸邑在豳州地理志屬右扶風枸音荀

蘇駟軍於泥陽

集解徐廣曰駟一作駟索隱北地縣名駟者龍馬也正義故城在寧州羅川縣

北三十一里泥谷水源出羅川縣東北泥陽源側有泉於泥中潛流二十餘步而流入泥谷又有泥陽湫在縣東北四十里

賜食邑武成六千戶

正義縣在華州鄭縣東十三里

以隴西都

尉從擊項籍軍五月出鉅野與鍾離昧戰疾鬪受梁相

國印益食邑四千戶以梁相國將從擊項羽二歲三月

攻胡陵項羽既已死漢王爲帝其秋燕王臧荼反商以

將軍從擊荼戰龍脫

集解徐廣曰在燕趙之界駟案漢書音義曰地名索隱其地關

先

登陷陣破荼軍易下

正義易州易縣

卻敵遷爲右丞相賜爵列

侯與諸侯剖符世世勿絕食邑涿五千戶

正義涿州

號曰

涿侯以右丞相別定上谷

正義媯州

因攻代受趙相國印以

右丞相趙相國別與絳侯等定代鴈門得代丞相程縱

守相郭同將軍已下至六百石十九人遷以將軍爲太

上皇衛一歲七月以右丞相擊陳豨殘東垣又以右丞

相從高帝擊黥布攻其前拒

集解徐廣曰一作和駟謂拒方陳拒音矩索隱拒音

巨鄒氏引左傳有左拒右拒徐云一作和和軍門也漢書作前垣小顏以爲攻其壁壘之垣也李奇以爲前鋒堅藏若垣墻非也

陷兩陳得以破布軍更食曲周五千一百戶

除前所食凡別破軍三降定郡六縣七十三得丞相守

相大將各一人小將二人二千石已下至六百石十九

人商事孝惠高后時商病不治

集解文頴曰不能治官事

其子寄字

況

索隱酈寄字也酈氏本作兄亦音況

與呂祿善及高后崩大臣欲誅諸

呂呂祿爲將軍軍於北軍太尉勃不得入北軍於是乃

使人劫酈商令其子況給呂祿

索隱給欺也詐也音待

呂祿信之

故與出游而太尉勃乃得入據北軍遂誅諸呂是歲商

卒諡爲景侯子寄代侯天下稱酈況賣交也

集解班固曰夫賣交

者謂見利而忘義也若寄父爲功臣而又執劫雖推呂祿以安社稷誼存君親可也

孝景前三年

吳楚齊趙反上以寄爲將軍圍趙城十月不能下得俞

侯樂布

集解駟案俞音舒索隱俞音輸又音飲縣名在河東

自平齊來乃下趙城

滅趙王自殺除國孝景中二年寄欲取平原君爲夫人

集解蘇林曰景帝王皇后母臧兒也

景帝怒下寄吏有罪奪侯景帝乃以

商他子堅封爲繆侯

集解徐廣曰繆者更封邑名陸曰靖索隱繆音穆邑也漢書無繆

續酈氏後繆靖侯卒子康侯遂成立遂成卒子懷侯世

宗立

集解徐廣曰世一作他

世宗卒子侯終根立爲太常坐法國

除

汝陰侯

正義汝陰即今陽城

夏侯嬰沛人也爲沛廐司御

索隱案楚漢春

秋云滕公爲御也

每送使客還過沛泗上亭與高祖語未嘗不

移日也嬰已而試補縣吏與高祖相愛高祖戲而傷嬰

人有告高祖

集解韋昭曰告白也白高祖傷人

高祖時爲亭長重坐傷

人集解如淳曰爲吏傷人其罪重也

告故不傷嬰

集解鄧展曰律有故乞鞠高祖自告不傷

人索隱案晉灼云獄結竟呼囚鞠語罪狀囚若稱枉欲乞鞠者許之也

嬰證之後獄覆

索隱

案韋昭曰高帝自言不傷嬰嬰證之是獄辭翻度也

嬰坐高祖繫歲餘掠笞數百

終以是脫高祖高祖之初與徒屬欲攻沛也嬰時以縣

令史爲高祖使上降沛一日

正義上爲子傷反使所吏反又曰謂父老聞城門迎

高祖爲沛公賜嬰爵七大夫以爲太僕從攻胡陵嬰

與蕭何降泗水監平

集解張晏曰胡陵平所止縣何嘗給之故與降也

平以胡

陵降賜嬰爵五大夫從擊秦軍碭東攻濟陽下戶牖破

李由軍雍丘下以兵車趣攻戰疾賜爵執帛常以太僕
奉車從擊章邯軍東阿濮陽下以兵車趣攻戰疾破之
賜爵執珪復常奉車從擊趙賁軍開封封楊熊軍曲遇嬰
從捕虜六十八人降卒八百五十人得印一匱

索隱案說文云

匱匣也謂得其時自相部署之印

因復常奉車從擊秦軍雒陽東以兵

車趣攻戰疾賜爵封轉爲滕公

集解徐廣曰今也烟案鄧展曰今沛郡公丘漢

書曰嬰爲滕令奉車故號滕公正義滕卽公丘故城是在徐州滕縣西南十五里

因復奉車從

攻南陽戰於藍田芷陽

索隱芷音止地名今霸陵也在京兆縣

以兵車趣

攻戰疾至霸上項羽至滅秦立沛公爲漢王漢王賜嬰
爵列侯號昭平侯復爲太僕從入蜀漢還定三秦從擊
項籍至彭城項羽大破漢軍漢王敗不利馳去見孝惠
魯元載之漢王急馬罷虜在後常蹶兩兒欲棄之

索隱
蹶音

厥又巨月反一音居
衛反漢書作蹶音按

嬰常收竟載之徐行面雍樹乃馳

集解服虔曰高帝欲斬之故嬰圍樹走也而向樹也應
劭曰古者皆立棄嬰恐墜小兒各置一面雍持之樹立
也蘇林曰面陽人謂抱小兒爲雍樹面者大人以面背
向貼之小兒抱大人頸似懸樹也索隱蘇林與晉灼皆
同今則無其言或當時有漢王怒行欲斬嬰者十餘卒
此說其應服之說蓋疎也

得脫而致孝惠魯元於豐漢王旣至滎陽收散兵復振

賜嬰食祈陽

集解徐廣曰祈一作沂索隱蓋鄉名也漢書作沂楚無其縣

復常奉車

從擊項籍追至陳卒定楚至魯益食茲氏

索隱縣名也地理志屬太

原漢王立爲帝其秋燕王臧荼反嬰以太僕從擊荼明

年從至陳取楚王信更食汝陰剖符世世勿絕以太僕

從擊代至武泉雲中

索隱地理志武泉屬雲中正義二縣在朔州善陽縣界

益食

千戶因從擊韓信軍胡騎晉陽旁大破之追北至平城
爲胡所圍七日不得通高帝使使厚遺閼氏冒頓開圍

一角高帝出欲馳嬰固徐行弩皆持滿外向卒得脫益

食嬰細陽千戶

索隱地理志屬汝南

復以太僕從擊胡騎句注北

大破之以太僕擊胡騎平城南三陷陳功爲多賜所奪

邑五百戶

集解騶案漢書音義曰時有罪過奪邑者以賜之

以太僕擊陳豨黥

布軍陷陣卻敵益食千戶定食汝陰六千九百戶除前

所食嬰自上初起沛常爲太僕竟高祖崩以太僕事孝

惠孝惠帝及高后德嬰之脫孝惠魯元於下邑之間也

正義宋州

碭山縣

乃賜嬰縣北第一曰近我以尊異之孝惠

帝崩以太僕事高后高后崩代王之來嬰以太僕與東

牟侯入清宮廢少帝以天子法駕迎代王代邸與大臣

共立爲孝文皇帝復爲太僕八歲卒諡爲文侯

索隱案姚氏云

三輔故事曰滕文公墓在飲馬橋東大道南俗謂之馬冢博物志曰公卿送嬰葬至東都門外馬不行拊地悲鳴得石椁有銘曰佳城鬱鬱三千年見白日吁嗟滕公居此室乃葬之子夷侯竈立七年

卒子共侯賜立三十一年卒子侯頗尚平陽公主立十

九歲元鼎二年坐與父御婢姦罪自殺國除

賴陰侯灌嬰者睢陽販繒者也

正義今陳州南潁縣西北十三里賴陰故城是

也雒陽宋州宋城縣

高祖之爲沛公略地至雍丘下章邯敗殺項

梁而沛公還軍於碭嬰初以中涓從擊破東郡尉於成

武及秦軍於扛里疾鬪賜爵七大夫從攻秦軍亳南開

封曲遇戰疾力

集解服虔曰疾攻之

賜爵執帛號宣陵君從攻陽

武以西至雒陽破秦軍尸北北絕河津南破南陽守齮

陽城東遂定南陽郡西入武關戰於藍田疾力至霸上

賜爵執珪號昌文君

索隱亦稱宣陵君皆非爵土加美號耳

沛公立爲漢

王拜嬰爲郎中從入漢中十月拜爲中謁者從還定三

秦下櫟陽降塞王還圍章邯於廢丘未拔從東出臨晉

關擊降殷王定其地擊項羽將龍且魏相項他軍定陶

南疾戰破之賜嬰爵列侯號昌文侯食杜平鄉

索隱謂食杜縣

之平復以中謁者從降下碭以至彭城項羽擊大破漢

王漢王遁而西嬰從還軍於雍丘王武魏公申徒反

集解

張晏曰秦將降爲公今反

從擊破之攻下黃

正義故城在曹州考城縣東二十四里

西

收兵軍於滎陽楚騎來衆漢王乃擇軍中可爲車騎將

者皆推故秦騎士重泉人

集解徐廣曰重泉屬馮翊正義故城在同州蒲城縣東南

四十李必駱甲習騎兵今爲校尉可爲騎將

索隱必甲二人名也

姚氏案漢紀桓帝延熹三年追錄高祖功臣李必後黃門丞李遂爲晉陽關內侯也

漢王欲拜之

必甲曰臣故秦民恐軍不信臣臣願得大王左右善騎

者傳之

集解如淳曰傳音附猶言隨從者

灌嬰雖少然數力戰乃拜灌

嬰爲中大夫令李必駱甲爲左右校尉將郎中騎兵擊

楚騎於滎陽東大破之受詔別擊楚軍後絕其餉道起

陽武至襄邑擊項羽之將項冠於魯下破之所將卒斬

右司馬騎將各一人

集解張晏曰主右方之馬左亦如之

擊破柘公王武

軍於燕西

集解徐廣曰柘屬陳索隱案武柘縣令也正義柘屬淮陽國按滑州柘城本南燕國也

所將卒斬樓煩將五人

集解李奇曰樓煩縣名其人善騎射故以名射士爲樓煩取其

美稱未必樓煩人也張晏曰樓煩胡國名

連尹一人

集解張晏曰大夫楚官索隱案左傳莫敖連尹

宮廐尹是

擊王武別將桓嬰白馬下破之所將卒斬都尉一

人以騎渡河南送漢王到雒陽使北迎相國韓信軍於

邯鄲還至敖倉嬰遷爲御史大夫三年以列侯食邑杜

平鄉以御史大夫受詔將郎中騎兵東屬相國韓信擊

破齊軍於歷下所將卒虜車騎將軍華毋傷及將吏四

十六人降下臨菑得齊守相田光追齊相田橫至嬴博

破其騎所將卒斬騎將一人生得騎將四人攻下嬴博

破齊將軍田吸於千乘所將卒斬吸東從韓信攻龍且

留公旋高密

索隱留縣令稱公旋其名高密縣名在北
海漢書作假密假密地名不知所在未知

孰是耳正義留縣
在沛郡公其令

卒斬龍且

集解文頴
曰所將卒

生得右司馬連

尹各一人樓煩將十人身生得亞將周蘭齊地已定韓

信自立爲齊王使嬰別將擊楚將公杲於魯北破之轉

南破薛郡長身虜騎將一人攻博陽前至下相以東南

僮取慮徐

索隱取音秋慮音閤取又音趣
僮徐是二縣取慮是一縣名

度淮盡降其

城邑至廣陵

集解駟案漢書音義曰住廣陵以禦敵正
義謂從下相以東南盡降城邑乃至廣陵

皆平定也

項羽使項聲薛公郊公復定淮北嬰渡淮北擊破

項聲郊公下邳

正義郊音設東海縣

斬薛公下下邳擊破楚騎於

平陽

索隱小顏云此平陽在東郡地理志太山有東平
陽縣正義南平陽縣城今兗州鄒縣也在兗州東

南六十二里按鄒縣去徐州滕縣界四十餘里也

遂降彭城虜柱國項佗降留

薛沛鄧蕭相攻苦譙

正義戶焦二音

復得亞將周蘭與漢王會

頤鄉

集解徐廣曰苦縣有頤鄉索隱音以之反

從擊項籍軍於陳下破之所

將卒斬樓煩將二人虜騎將八人賜益食邑二千五百

戶項籍敗垓下去也嬰以御史大夫受詔將車騎別追

項籍至東城

正義縣在濠州定遠縣東南五十五里

破之所將卒五人共

斬項籍皆賜爵列侯降左右司馬各一人卒萬二千人

盡得其軍將吏下東城歷陽

正義和州歷陽縣即今州城是也

渡江破

吳郡長吳下

集解如淳曰雄長之長也索隱下有郡守此長即令也如淳以為雄長非也正義令

蘇州也案如說非也吳郡即吳郡守也一破吳郡長兵於吳城下而得吳郡守身也

得吳守遂定

吳豫章會稽郡還定淮北凡五十二縣漢王立爲皇帝

賜益嬰邑三千戶其秋以車騎將軍從擊破燕王臧荼

明年從至陳取楚王信還剖符世世勿絕食潁陰二千

五百戶號曰潁陰侯以車騎將軍從擊反韓王信於代

至馬邑受詔別降樓煩以北六縣斬代左相破胡騎於

武泉北

正義縣名在朔州北一百二十里

復從擊韓信胡騎晉陽下所

將卒斬胡白題將一人

集解服虔曰胡名也

受詔并將燕趙齊梁

楚車騎擊破胡騎於硃石

集解服虔曰硃音沙索隱劉氏音干卧反

至平城

爲胡所圍從還軍東垣從擊陳豨受詔別攻豨丞相侯

敬軍曲逆下破之卒斬敵及特將五人

集解文穎曰特一之特也降

曲逆盧奴上曲陽安國安平

正義盧奴定州安喜縣是曲陽定州曲陽縣是安平

定州安平縣是

攻下東垣黥布反以車騎將軍先出攻布別將

於相破之斬亞將樓煩將三人又進擊破布上柱國軍

及大司馬軍又進破布別將肥誅

集解徐廣曰一作誅索隱案漢書作肥誅

嬰身生得左司馬一人所將卒斬其小將十人追北至

淮上益食二千五百戶布已破高帝歸定令嬰食潁陰

五千戶除前所食邑凡從得二千石二人別破軍十六

降城四十六定國一郡二縣五十二得將軍二人柱國
相國各一人二千石十人嬰自破布歸高帝崩嬰以列
侯事孝惠帝及呂太后太后崩呂祿等以趙王自置爲
將軍軍長安爲亂齊哀王聞之舉兵西且入誅不當爲
王者上將軍呂祿等聞之乃遣嬰爲大將將軍往擊之
嬰行至滎陽乃與絳侯等謀因屯兵滎陽風齊王以誅
呂氏事

正義風
方風反

齊兵止不前絳侯等既誅諸呂齊王罷
兵歸嬰亦罷兵自滎陽歸與絳侯陳平共立代王爲孝

文皇帝孝文皇帝於是益封嬰三千戶賜黃金千斤拜
爲太尉三歲絳侯勃免相就國嬰爲丞相罷太尉官是
歲匈奴大入北地上郡令丞相嬰將騎八萬五千往擊
匈奴匈奴去濟北王反詔乃罷嬰之兵後歲餘嬰以丞
相卒諡曰懿侯子平侯阿代侯二十八年卒子彊代侯
十二年彊有罪絕二歲元光三年天子封灌嬰孫賢爲
臨汝侯續灌氏後八歲坐行賄有罪國除

太史公曰吾適豐沛問其遺老觀故蕭曹樊噲滕公之

冢及其素異哉所聞方其鼓刀屠狗賣繒之時豈自知
附驥之尾垂名漢庭德流子孫哉余與他廣通爲言高
祖功臣之興時若此云

索隱案他廣樊噲之孫後失封蓋嘗訝太史公序蕭曹樊滕之

功委具則從他廣而得其事故備也

索隱述贊曰聖賢影響雲蒸龍變屠狗販繒攻城野戰扶義西上受封南面酈況賣交舞陽內援滕灌更

王弈葉

繁衍

史記卷九十五

史記卷九十五考證

樊鄴滕灌列傳從攻圍東郡守尉於成武○凌稚隆曰
按漢書從攻圍作從攻圍注圍地名

以待大王正義時羽未為王史追書○臣照按此等稱

謂非追書也直是當時尊奉之辭觀亞夫謂項莊君
王為人不忍可見時羽雖未為王然已擅命立雍王
矣稱以大王若固有之耳。

擊章平軍好時正義章平即章邯子也○臣照按高祖

紀明云雍王弟章平正義何所據而以為邯子也疑弟字之誤

從擊秦車騎壞東○凌稚隆曰一本車作軍

定食舞陽五千四百戶○功臣表作五千戶漢表同

蘇馱軍於泥陽索隱北地縣名馱者龍馬也○楊慎丹鉛總錄曰馱從馬從旦音亶無龍馬之訓

更食曲周五千一百戶○功臣表云四千八百戶漢表同

趙王自殺除國○徐孚遠曰趙除國於酈寄傳無涉蓋刪截舊文未淨者

寄欲取平原君為夫人○孝武帝即位始尊皇太后母臧兒為平原君此乃追書之

子康侯遂成立○功臣表無成字漢表有之
子懷侯世宗立○功臣表無世字漢表有之

子侯終根立為太常坐法國除○功臣表云坐祝詛誅國除漢表云嗣二十九年後二年祝詛上要斬

後獄覆索隱案韋昭曰高帝自言不傷嬰嬰證之是獄
辭翻覆也○陳沂曰證之已證其不傷矣後又有翻
覆故嬰坐繫且受掠也

嬰與蕭何降泗水監平張晏曰胡陵平所止縣何嘗給
之故與降也○楊慎曰降降之也嬰與何或用兵或
招降之也張說非是

面雍樹○余有丁曰按楊慎云服說是愚謂依此則不
應下文繞說欲斬嬰者十餘疑蘇說近之蓋初載徐

行雍抱之乃疾馳也

賜所奪邑五百戶漢書音義曰時有罪過奪邑者以賜之○劉辰翁曰賜所奪邑恐是嬰以他故奪邑至是復賜之耳漢書註亦有是說

子侯頗尚平陽公主○臣照按傳與表敘頗尚主年歲

不明不知此平陽主何人也若即是武帝姊則曹壽之前不聞先有所適而元光二年戊申曹壽未死元鼎二年丙寅以前主歸衛氏且十年青又未死不應

復有他適衛青傳正義引漢書云平陽侯曹壽有惡疾就國乃詔青尚平陽公主則曹衛之間更無其人武帝時又不聞有兩平陽公主

坐行賕有罪國除○漢表元朔五年坐子傷人首匿免千戶

史記卷九十五考證